The image shows the front cover of an old book. The cover is decorated with a marbled paper pattern consisting of large, irregular, light brown or tan-colored shapes separated by thin, dark, branching lines. A small, rectangular, reddish-brown label is affixed to the bottom right corner of the cover. The label contains the text "Mere1" on the first line and ".B592r" on the second line. The book is set against a dark, textured background.

Mere1
.B592r

MErel .H592r

INSTITUTE
OF
ISLAMIC
STUDIES

44921 *
McGILL
UNIVERSITY


2676281

1794 - 1795

1796 - 1797

1798 - 1799

1800 - 1801



Musa Carullah Bigi

موسی بیگیف .

Library
Institute of Islamic Studies

APR 8 1970

رَحْمَتُ الْهِيرْبُرْهَانَدَرِي

Rahmet-i İlāhiye bürhānları

ناشری :

شرق کتابخانہ سی

اورسکی .

اورنبورغده « وقت » مطبعہ سی .

ТИП. ГАЗ. „ВАКТЪ“ ВЪ ОРЕНБУРГЪ.
1911

۲۷۷

05018 117A

تذکره

MEre1

B592r

تذکره

تذکره

کتاب اسماعیل حاجه زاده
۱۹۱۳

بِسْمِ اللَّهِ الرَّحْمَنِ الرَّحِيمِ

تاریخ ادیان .

دین نه ایملش بیانندن قبل ، تاریخ ادیان حقنده بر
ایکی سوز سویله مک البته مومدر .
انسانک احوال اقتصادیه سندن ، سیاسیه سندن ، ترقیات
علمیه سندن تاریخده بحث ایتمک مهم اولور ایسه ، دیانت
انسانیه نك تاریخندن بحث ایتمک ، شبهه یوق ، دها زیاده
اهمیتلی اولور . دین ، انسانک روحانیتی طرفنده ترقیاتدن
عبارتدر ؛ حیات انسانیه ده الك اساسلی الك مؤثر روح -
روح دیانتدر . بر ملتک دینی او ملتک طبیعتدر . انسانک
حیاتدن مقصدی ، حیاتده سیاستی همه سی او انسانک دیننده
انعکاس ایدر . بر دین ، بر زمانه قیاسله سویلنور ایسه ،
او دین ملتک او زمانده اولان درجه سنه غایت درست بر
میزان اولور . هر بر دین اوز اتباعلرینک درجه فکرلرینی
آچیق صورتده کوسنرر . انسانک مقصدلری حاجتلری
تلاوتنده دعالرنده تماما ظاهر اولور ، قربانلری ده عهومی

وجدانك تحملنه مناسب كلور. انسانك ديانتيه مدنيته
 برى برينه تبعاً تقدم هم ترقى ايندكرينه كوره، انسانك
 درجه دينيهسى درجه مدنيهسنه تاماً مطابق اولور. اويله
 ايسه، تاريخ اديان دن بحث ايتك مدنيت اساسلرندن
 اصلندن بحث ايتك ديمك اولوب، انسانك هم روحانى
 هم مادى ترفياتندن بحث ايدن بر تاريخ عمومى اولور.
 بوندن ده زياته مفيد بر علم عالم انسانيت ده تصور اولنه
 بيلورمى؟

تاريخ اديانك شو جهندن اهميتى علوم و معارفه رغبت
 ايدن هر بر ملت ايچون البته غايت بيوكدر. لىكن بزم
 اسلاميت ايچون تاريخ اديانك ده بيوك بر اهميت
 مخصوصهسى واردر. بزم اسلاميتك علويتنه كمالنه، بر بوزنده
 عالم بشريت ده ظاهر اولمش دينلره قياسله اك افضللمگنه
 ايمان ايدر ايسهك، شو ايمانمزه قورى بر لاف، برهان سز
 اساس سز بر دعوى دگل ايسه، او تقدير ده بزه اول ده
 كلوب كتمش ياخود شوكونه قدر قالمش دينلرك هر برينه
 تفصيلاتيله واقف اولمق لازمدر. ديگر دينلرك اعتقادلرينى
 تعليملرينى بيلمه مش ايكن «اسلاميت - دينلرك اك
 افضل» ديمك درست اولورمى؟ بر تقدير سوزمز درست ده
 اولسون، لىكن بلا مقايسه سويلنمش سوز ديگر ملتلرك
 كوزنده بر قيمت علميه ي حائز اولاي بيلورمى؟ بزم شريعت
 اسلاميه غائب عليهنده حكم ايتمكدن حاكملرى منع ايتمشدر.

اويله ايسه، اولده كلوب كتمش دينلر ك تفصيلي بزه معلوم دگل ايكن، او دينلر ك نقصاني ياخود بطلانيه نصل حكم ايده بيلورز؟ اسلاميت او دينلر دن افضلدر ديمك ايچون، شبيهه يوق، او دينلر ك بزه معلوميتي لازمدر.

تاريخ اديان دن بحث ايتمك بزه اوچ فائده ويرر:
 (۱) اولاً اسلاميت ك علويتی بزه كون كبی ظاهر اولور.
 (۲) اسلاميت ك حقانيتنه، علويتنه ايمانز، شوكونده روسيه ده وار اكثر اماملر ك ايماني كبی، «عن جهل» ايمان اولوق دن نجات بولور. (۳) عموماً طلبه لر مزك، اكثر اماملر مزك ايمانلر ينه اعتقادلر ينه استيلا ايتمش اضطراب يا هيچان كبی بيوك بر بليۀ دينيه روسيه مسلمان لر يذك باشلار نندن مرفوع اولور.

تاريخ اديان ده تعاليم اسلام ك علويتنه، حقيقتنه دلالت ايتمك جهتي شوكونده ير يوزنده وار اهل اسلام ك روحنه هم مزاجنه غايت موافق غايت ملايم هم محبوب بر جهندر. شو جهتي اعتبار ايدر ايسه ك، تاريخ اديان دن بحث ايتمك اهل اسلام ايچون غايت بيوك اهميتي حائز اولوب، ديني مدرسه لر ده تاريخ ادياني على الاجمال ايسه ده اوقومق واجب كبی بر شيدر. زيرا تاريخ اديان حيات انسانيه ده مدنيت ك اساسندن بحث ايدر بر فن اولوب، تعاليم اسلام ك ك صوك درجه علويتنه دلالت هم برهان اولا بيلور يال كز بر واسطه در.

بوگا کوره بزه شمدی دینلرک تار یخندن بحث ایدرز .
 او دینلر نصل نشأت ایتمش ؟ صوگره نصل ترقی ایتمش ؟
 ترتیبیله بیان قیلورز . لیکن بز او اسکی دینلردن بحث
 ایدر ایکن ، او دینلری انسانلرک چهلرلرندن ، عقلسلزلق
 لرندن ، کفر لرندن وجوده کلمش شیلر در کبی نظر ایتمه یوب ،
 بلکه دین ده انسان ده طبیعی بر حالتدر ؛ مدنیت کبی
 طبیعی بر صورت ده نشأت ایتمش ؛ طبیعی صورت ده
 بلاسکته ترقی ایدر بر حالتدر نظریله همه ادیان دن تام
 هم خالص بر حریتله علمی صورت ده بحث ایدرز .

حیات انسانیه ده هر برشی طبیعی صورت ده باشلانوب ،
 طبیعی طرزده بر سلسله ترقیات اوزرنده بلاتوقی ترقی
 ایدر طورور . انسانک دینی ده شو عادی عمومی فاعده
 طبیعیه حکمندن مستثنی دگلدر . احوال اقتصادیه احوال
 سیاسیه کبی انسانک دینی ده غایت ساده بر طرزده باشلا-
 نوب ، صوگره دائما حرکت ده بولنوب احيانا ترقی ، احيانا
 انحطاط ایدرک شوکونگی حالنه کلوب یتمشدر .

بز شو اعتقادی قبول ایدر ايسهك ، البته ، دینلرک
 هر برینه احترام نظریله باقارز . بر ملتى عبادتی یا اعتقادی
 ایچون تکفیر یا تضلیل ایتمکدن البته بتون قوتمزله اجتناب
 ایدرز . همه دینلره بر دینک سلسله ترقیاتنه نظر کبی نظر
 ایدر ايسهك ، او وقت دینی ایچون بر ملتى تکفیر ایتمک ،
 یاخود دینی ایچون بر ملتیه عداوت صافلامق ضرورتی

بزه البته هیچ بر صورتله قالماز. ادیانک تار یخندن بحث ایدر ایکن، بر دینی حق، دیگرلرینی باطل دیمک کبی تعبیرلری قوللانمق دن، ادب بحث اقتضاسیله، بز البته احتراز ایدرز.

بیلورم شوسوزمی اهل کلامک اکثری، صوڭ زمانلرده بزم کتب کلامیه بی اوقومشلارک همه سی انکار ایدر. یالکیز اسلامیه دگل، بلکه فقط اوز مذهبنه گنه تعصب ایدوب، دیگر همه انسانلری تضلیل یا تکفیر ایدن بر متکلم حوصله سنه همه انسانلری تصویب ایتمک هر بر انسانی نجات دائره سنه ادخال ایتمک اعتقادی هیچ بر صورتله صیغماز. لکن شو اعتقاد - بر حقیقتدر.

عہوم عالم انسانیتک نجاتی مسئله سی بزم کتب کلامیه ده بر مسئله خلافیه کبی نقل اولنمشدر. کتب کلامیه ده بحث نظرده، کتب اصولده باب اجتہادده شو مسئله «مجتهد فی الاصول مصیب می دگلمی؟» عباره سیله ذکر قیلنوب، علمای اسلامک اکثری «مجتهد فی الاصول قطعاً مخطی در» دیمشدر. جاحظ، عنبری، محاسبی کبی بیوک اماملر، همده صوفیه - لارک بیوک اماملری «اصول دینده اجتہاد ایدن انسان البته مصیبدر» دیمشدر.

صوفیه لارک ای بیوکلری دائماً تکرار قیلنور بر تسبیح کبی

فکلهم فی رحمة الله خالد

موحد او ذو الشریک وجامد

بیت حقیقتلرینی اوفورلار ایدی . یعنی انسانلرک هر
بری موحد مشرک یا منکر اولسون ، اللهک کیک رحمتلرنک
مکگکو قالاچقدیر .

ابو یزید بسطامی ، جنید بغدادی ، ذوالنون مصری
کبی الک بیوک اهل تصوف ، کلام همده اصول کتابلرینک
روایتلرینه کوره عالم اسلامده اسملری محترم بیوک علمای
نظر - عموم عالم انسانیتک نجاتیله حکم ایتمشلر ایسه ،
بنده او بیوکلرک او قدر معقول سوزلرینی ممنونیتله قبول
ایدوب ، تاریخ ادیاندن بحث ایدرم ایکن هیچ بر قومی
هیچ بر ملتى اعتقادى عبادتی ایچون تکفیر یا تضلیل
ایتمزدن ، خالص همده معقول بر حریت تامه ایله هر بر
دیندن ادب دائره سنده بحث ایده بیلورم .

عالم انسانیتک مدنیتی نصل ایسه ، دیانتیده اولیلدر .
انسان احوال مدنیه سنده ، شبهه یوق ، طبیعی صورته ترقی
ایده کلمشدیر . مدنیتک دون درجه لرنده اولوب کچمیش
انسانلری ، مدنیتده دونلکلی ایچون ، شو کون سوکمک
یاخود عیب ایتک جائز دگل ایسه ، دیانتک دون درجه -
لرنده اولوب کچمیش انسانلریده سوکمک یا تکفیر ایتک البته
ادب بحث اقتضاسیجه هیچ بر صورته مناسب دگلمدر .

دین انسانلرده طبیعی فطری بر حالتدر : الله قرآن
کریمده روم سوره سنده (۳۰) نچی آیت کریمه ده « فافهم
وجهک المدين حنیفاً . فطرت الله التی فطر الناس علیها .

لا تبديل لخلق الله». دېمىش دگلمى ؟

ايندى شو آيتك معجز نظمىده بر قدر ملاحظه قىلايىق:
 الله دينك فطرىلگىنى بيان سوكنده «لا تبديل لخلق الله»
 نېچون دېمىش ؟ بوناك سوكنده شو آيتك اوزنده «ذلك الدين
 القيم» كىي جمله معجزه يى ذكر ايتمىكن مقصد الهى نه ايدى ؟
 بن قرآن كريم ده بويله معجز آيت لارك ارشاد لريله
 مهتدى اولوب ، «ربنا وسعت كل شىء رحمة وعلماً» كىي
 آيت كريمه لرك احاطه عموميه لرى دائره سنه عمومى هر بر
 انسانك هر بر ملتك دخللر ينى جزماً قطعاً بيلوب ، ارحم
 واکرم الله حضرتلرينك اك كيك رحمت مطلقه لرىنى مسكين
 انسانلرك هيچ برندن قزغانماق ايچون ، عالم وجودك هر
 بر ذره سنه قدر من غير حساب مبذول قىلمىش رحمت
 مطلقه نك اك كيك صورتده آچيلمىش قاپولرىنى انسانلرك
 يوزنده قاپاماق ايچون : «عموم عالم انسانيتك نجاتيله»
 حكم ايدرم . بنم شو مسئله ده اعتقاد شويله در .

تاريخ ادياندىن يوليله بحث ايتمك ايچونده عالم انسا
 نيت ده هر بر انسانله گوزل صورتده معامل ايتمك ايچون
 ده ، البته رحمت الهيه نك عموميتنه ، عموم انسانلرك ده البته
 يوم قيامت ده نجاتنه اعتقاد باغلامق لازمدر .

بن بيلورم : شو سوزمى ايشانلر ، اماملر قبول
 ايتمه يور . يالكز اسلاميت ايچونگنه دگل ، اوزلرينه تماميله
 معلوم دگل اشعر يلك حنفيك مذهب لرى ايچون ده جاهلانله

تعصب ایدوب، اوزلرینک جهلیاتلرینه مخالفت ایدن هر
بر آدمی تکفیر ایدن اماملر ایشانلر البته «عموم عالم
انسانینک نجاتنه» اعتقاد ایده مزلر.

اهل علمی تکفیر ایتمک عالم اسلامیتده اسکی بر
بلیه ایدی. شو کونلرده بزم روسیهده شو تکفیر بلیه سی
فوق الحدود انتشار ایتدی. هر بر ایشان هر بر امام
اوزینک جاهلانه هواسنه موافق دگل آدمی تکفیر ایدر
اولدی. علمیه مقابله ایتمکدن عاجز ایشان یا امام اوزلرینک
فصولارینی نادانلقلرینی گویا ستر ایتمک فکر بله اسلامیت
پرده سی آرفاسندن، آچیق فکر بولنه سلوک ایتمش هر
بر انسان اوزرینه تکفیر اوقلری آتار اولدیلر. او یله
ایشانلرک او یله اماملرک اسلامیتله بر پاره لك آلیش
ویریشلوی یوق ایسهده، او ایشانلر دیگر انسانلری
تکفیر ایتمکدن اوتانماز اولدیلار.

شو قدر عمومی همه تحملدن طیش اولان او بلیه یه
بر قدر چاره بولمق ایچون، یاخود او ایشانلرک حمیت
جاهلیه لرینه بر قدر تعدیل ویرمک ایچون، تاریخ ادیانندن
بختلرله مقدمه صورتده «رحمت الهیه عمومیتی» مسئله
میجه سنه دائر قرآن کریمده وارد اولمش آیتلری علمی
بیانلریله نشر ایدرم انشاء الله.

رحمت الهیه عمومیتی حقنده اعتقاد .

على السمع عولنا فكنا اولى النهى .
ولا علم فيما لا يكون عن السمع .
اذا كان معصوما و قال ، فقله
هو الحق لا يأتيه بين على القطع .
فعقل و شرع صاحبان تألفا
فبورك من عقل و بورك من شرع !

«رحمت الهیه عمومیتی» نظریه سی - سعادت طرفه
دائمی صورته ترقی ایتک ایچون خلق اولنمش - عالم
انسانیتک حیات استقبالیه سنه اساس اولا بیلور بر حقیقت
اصلیه اولیه اولدیغنه کوره ، اسلامیت روحنه اک موافق اولان
شو نظریه من القدیم رغبتی اعتنامی جلب ایتمش ایدی .
الله رب العالمین حضرتلری طرفندن بر یوزنده خلیفه
اولمق صفت جلیل سبله تشریف قیلنمش انسانلرک ابدیت
طرفنده مؤبد صورته شقاوتلری ، ارحم الراحمین الله تعالی
حضرتلرینک رحمت غیر متناهیه سنه ، حکیم مطلق الله تبارک
و تقدس حضرتلرینک حکمت غیر محدوده لرینه ، بنم فکرم
جه ، او قدر موافق کلمه یور ایدی .

ابدیت طرفنده متناهی دگل زمانلره نسبتله بر ثانیه
 بر سیکونت اولان حیاتنده خالص راحت یوزی کورمه مش
 انسان بالالارینک اکثری استقبالده مؤبد صورتده شقی
 اولاق ایسه، اوله مسکین انسانلری خلق ایتمکدن
 ارحم الراحمین الله رب العالمین حضرتلرینک مقصدی نه
 ایدی؟ انسانلرک اکثرینی مؤبد صورتده تعذیب ایده چک
 ایسه، او وقت الله تعالی حضرتلرینک رحمت الهیهسی
 غضب الهیسنه نسبتله یوق حکمنده اولما یورمی؟

اشته شویله «شبهه» لر تأثیر یله رحمت الهیه عومیتی
 بنم قلمده همان همیشه رسوخ کسب ایدر طورر ایدی.
 لکن او بیوک مسئله یی علمی صورتده حل ایده بیلیمکدن
 همان عاجز ایدم. کوکلمده کوکشمش شو معما بنی دائماً
 راحتسز ایدر اولدی. علمی نظریه لر آراسنده، بنم
 فکرمجه، اثباتی الک مهم- نظریه «رحمت الهیه عومیتی»
 نظریه سی اولدی ده قالدی.

ابعاد غیر متناهیهدن بحث ایدن اهل ریاضت، او
 متناهی دگل بعداردن قیاس قبول ایتمز درجه ده واسعه
 اولان رحمت الهیه دن ده بحث ایتمش اولسه لار ایدی، البته.
 رحمت الهیه عومیتی ده شو کونه قدر بر حقیقت قطعیه اولوب
 قالور ایدی.

لکن ابعاد غیر متناهیهدن بحث ایتیه همه همتلرینی
 صرف ایتمش اهل ریاضت، متناهی دگل شیلره قیاس قبول

ایتمز در جهده واسع اولان رحمت الهیه دن بحث ایتمیه نه دندر،
وقت بولامامش لر.

اولیه مهم مسئله اساسیه دن بحث ایتمک شـرفی -
حوصله لری طار، اُللرنده وار مقیاسلری ده قیصه اولان-اهل
کلام نصیبی اولمش ده قالمش!
بوکا کوره طبیعی، بن ده اولیه بیوک مسئله اساسیه یی،
صوڭ در جهده مشکل اولان معمای یی حل ایتمک فکر یله چاره سز
کتب کلامیه یه التجا ایتمدم.

هیچ بر انسانه هیچ بر مسئله ده هیچ بر وقت قناعت
ایتدور قدر معلومات ویرمه یین کتب کلامیه البته بکاده
شو مسئله حقنده بر فکر مستقیم ویرمک دن عاجز قالدی.
بلکه بالعکس بنم «شبهه» لرمی آرتدردی.

بزم کتب کلامیه حقائق اثبات ایتمک دن عاجز ایسه
ده، حقائق علیه اعتراضلری شبهه لری غایت قوتلی صورت
سرد ایتمک دن عاجز دگادر.

کتب کلامیه ده ذکر اولمش اعتراضلرک برینی، بنم
شو اخیرگی دعوامی بر مثال، بر شاهدله اثبات ایتمک ایچون
بوراده نقل ایدیم:

«الله نذب الناس الى العفو، و جعل ذلك من مكارم
الاخلاق، و ابان انه اولى من جزاء المسيء بما يسوءه،
و ذكر للعبدان اجر العافين عن الناس على الله. فالله احق
بهذه الصفة، لما هو عليه من عظيم الجود و واسع الكرم،

وجزيل الامتنان؛ ولا مكره له على المواخذة. فهو بالضرورة
اهل العفو والتكرم بالتجاوز عن العبد المسيء المتعدى
حدوده، عن اساءته، واهل لا سبال ذيل الكرم عليه.

الله اكرم ان تنساك رحمته

ومن يجود اذا لرحمن لم يجد

ثم ان انتصاف الحق بالجود و العفو عن الجاني اعظم
من انتصافه بالمواخذة على الاساءة. فان المواخذة والعقوبة
جزاء. وليس في الجزاء على الشر فضل؛ الا اذا كان في
الدنيا لها في افامة الحدود من افامة الامن العمومي و من
دفع المضرة العامة، وما في ذلك من المصالح التي تعود على
الناس. مثل قوله «وليكم في القصاص حياة» واما في الاخرة
فما ثم ما يندفع بعقاب المسيء مثل ما يندفع به في الدنيا
فالعقاب في الاخرة ليس فيه فائدة يعتد بها حكيم، وليس فيه
من لذة الانتقام ما يليق برحيم حلیم. وما يقال ان التعذيب
للتطهير عن الذنوب فليس بمعقول اذ قد كفى بسعة المغفرة
مطهرة. ولئن كان في التعذيب معنى يوجب التطهير فلاى
شىء التأييد؟

شو معنى ده اولان اعتراضلرى اهل كلام كتب كلاميه ده
غايت صراحتله صوكت درجه بر جسارتله سرد ايتمشلر. احياء
العلوم صاحبي امام غزالى حضرئلرى ده شو اعتراض
«الاقتصاد فى الاعتقاد» اسملى كتابنده ذكر ايتمشدر.
اك شديد اك معقول اعتراضلرى بيوك بر جسارتله

ذکر ایدر اهل کلام، جواب ویرمک امرنده، نه دندر،
 اوقدر جسارنله اوقدر نشاطله حرکت ایده میورلر. عقلی
 صورتده ایراد اولنمش اعتراضله البته لا اقل بر معتمد عقلی
 جواب ویرمک لازم ایسه ده، اعتراض خصوصنده عقل طرفنه
 کچمش اهل کلام، جواب خصوصنده عقلی اهمال ایدوب،
 نصوص شرعیه دن اوزلرینک عقللرینه نصیب اولا بیلمش
 وجهلر ایله گنه اعتراضله مقابله ایدرلر.

بوکما کوره ده، من القدیم کوکلمده رسوخ بولمش
 «شبهه» لر کتب کلامیه مطالعه سیله ازاله اولنه مادی. بلکه
 قوت کسب ایتدی. کتب کلامیه ده بنم احاطه م دائره سنه
 داخل اولمش سوزلرک هیچ بری بکا قناعت ویره مدی. عاقبت،

فلا تغرنک افوال مزخرفه

فان مدلولها جهل و تعلیل

دیدم ده، کوکلمده قرارلنمش «شبهه» لره جواب بولمق
 ایچون، ایندی دیگر بر یول اختیار ایتدم. عقل انسانی،
 کتابلرینک ایکی دفعه سی آراسنده حبس ایتمک قصدیه
 تالیف قبلنمش کتابلری بر طرفه بر اقدم ده، همه علومک
 اصلی اولان قرآن کریمه مراجعت اینمیه میل ایتدم.

إذا الرجوع الى التحقيق شیهة من

پری المعارف فی الایات والسور.

فکلمها عبر ان کنت ذا نظر

ولا یخیب الذی تسری به العبر.

لكن آيات قرآنيہي فہم ايتمك حقندہ ، كلاميون
 اصوليون قلمبلہ تاليف اولنمش تفاسيرلہ استعانت ايتمك
 بكا همان قناعت وبرہمدی . بن اهل تصوف قلمبلہ تاليف
 قيلنمش كتابلرہ النجا ايتدم : جلال الدين الرومی حضرتلرينك
 مثنويلرى ، القشيري حضرتلرينك رسالہلرى ، محبى الدين
 ابن عربى حضرتلرينك فتوحات مكيہسى بكا شو حقدہ
 غايت بيوك فائدہلر ويردى : شو اوچ كتاب كى آثار
 اسلامبلرك امانہسبلہ ، بنم كوكلمدہ متمكن اولمش «شبهہ»
 لرك عقدہلرى برر برر منجل اولدى . برى ديگرينہ
 تعارضلرى يوق صورتدہ ، آيات قرآنيہ بنم قلمبلدہ اورونلا-
 شدى . الله تعالى حضرتلرينك رحمت مطلقہسنہ حسن ظنلہ
 انتظارم ، عالم انسانيتك ابدیت طرفندہ استقبالنہ اساسلى
 صورتدہ غايت بيوك بر اميدلہ نظرم بنم كوكلمدہ غايت
 بيوك بر اتساع ويردى . عہوماً انسانلرك رحمت الہيہ
 مطلقہدہ خلودلرى ، بنم قلمبلدہ طارلق ايراث ايتمك دگل ،
 غايت بيوك شادلق ويرور اولدى . دينلرك هيچ برندہ
 يوق شويلہ عالى بر نظرى بن اسلاميتك تعاليم عاليہسنك
 كوروب ممنون اولور اولدم .

جلال الدين الرومی حضرتلرى مثنوى شريفك متعدد
 محللرندہ رحمت الہيہ عموميتنہ دائر متعدد بيتلر سويلامشدر .
 استانبول دہ شرحلہ برابر طبع اولنمش مثنوى شريفك
 بشنچى جلدندہ جلال الدين الرومی حضرتلرى ديہش :

بانگ می آمد که ای طالب بیا
 جود محتاج گدایان چون گدا
 جود می جوید گدایان و ضعیف
 همچو خوبان کاینه جویند صاف
 اولی خوبان زاینه زیباشود
 اولی احسان از گدا پیدا شود
 پس ازین فرمود حق درو الضعی
 بانگ کم زن ای محمد برگدا .
 چون گدا آیینۀ جود ست هان
 دم بود بر اولی آیینۀ زیان .
 آن یکی جودش گدا آرد بدید
 دین دیگر بخشد گدایان را مزید .

شو معنی ده اولان بیتار له جلال الدین الرومی
 حضرتلری هر ایکی عالم ده رحمت الهیه عمومیننه قائل
 اولمشدر .

محمی الدین ابن عربی حضرتلری فتوحات مکبیه ده
 متعدد محللرده «الرحمة الالهیه وسعت کل شیء . فما فی
 الوجود شیء لا یكون فی هذه الرحمة . ان ربك واسع
 المغفرة فلا تحجر واسعاً . فانه لا یقبل النجیر ومن الناس
 من یجادل فی اتساع رحمة الله ویدعی انها مقصورة علی
 طائفة خاصة . فحجروا وضیقوا ما وسع الله . فلو ان الله لا
 یرحم احدا من خلقه لحرم من رحمته من یقول بهذا .
 ولكن ابی الله الا الشمول » معناستده اولان جملهلری
 دلیللریله سرد اینمشدر .

محیی الدین ابن عربی حضرتلری آخرتده عذابك
انقطاعه دائر ادله شرعیلهری ده فتوحات مکیهده متعدد
بابلرده سرد ایتوب، شو اعتقادی ابو یزید بسطامی،
جنید بغدادی، سهل بن عبدالله التستری کبی الك بیوک
ذاتلره شبههسی یوق سندلرله اسناد ایتمشدر.

بن ده «وحسن اولئك رفيقا» دیدمده شو اوج ذات
کبی بیوک اهل علمك منهلرینه تقلید ایتدم. اوبیوکلرک
عقول عالیلهریله بیان اولنمش آیات کریمه لری کوردمده
اساسلی صورتده قناعت حاصل ایتدم.

قرآن کریمده «الشوری» سورسنده (۵) نچی «نکاد
السموات یفطرون من فوقهن. والملائكة یسبحون بحمد
ربهم، ویستغفرون لمن فی الارض. الا ان الله هو الغفور
الرحیم» آیت کریمه سنده ملائکه کرام بر بوزنده وار هر
بر انسان ایچون غفور رحیم الله تعالی حضرتلرینک درگاه
عظمتلرنده استغفار ایتمش ایسه، بن ده او بیوک فرشته
لره اقتدا ایدوب، ابدیت طرفنده عموم عالم انسانیتینک
نجاتلرینی اعتقاد ایده بیلورم دیدم.

شو اعتقاد بنم قلمده فوتلندی. عاقبت، مدرسه
حسینیده تاریخ ادیان درسلی مناسبتیل بن او اعتقادمی
مطبوعات عالمنه عرض ایتمک آرزوستهده کلدیم. عرض
ایتدم.

نظرلری کتب کلامیه جلدلرندن تخطی ایده مز بر نیچه

امام افندی «شورا» صحیفه لرنده او مقاله لرمی اوقور اوقوماز
بنم مقاله لرم درسارم علیهنده قیامت قوپاردیلار. علملریله
مقابل ایتمکدن عاجز او امام افندیلر ژورناللرینک صحیفه لرنده
بنم اوزرمدن ممکن طرفلرک هر برینه سعایت ایتمک کبی
دنائتدن اوزلرینی خلاص ایده مدیلر.

اعیش فی طیب نفس حیث کنت فما

اغصاف من وقع آفات ولا ضرر.

ادب علمک اقتضاسیل، همده «بل کذبوا بما لم یحیطوا
بعلمه ولما یأتهم تأویل» آیت کریمه سنک ارشادیله عمل
ایدوب، او امام افندیلره بنم طرفدن وعد اولنش ادله
قرآنییه منتظر اولوب طورمق لازم ایسه ده، «قوت علمیه»
لری او اماملری براقمادی: محترم امام افندیلر «بهلش»
اطرافنده «سلسله» جریده لرنده وار قدر قوتلرینی کوشتردیلر.
کافر ایتمک، مدرسه دن قومق، جان قییمق کبی شیلرک هر
بری امام افندیلرک آغزلرینه ده اللرینه ده کلدی.
البته هر کس بیلور او یله امام افندیلردن دیگر شی
مأمولده دگل ایدی.

بر مسئله علمیه یی حل ایده بیلمک ایچون لازم اولان
بر همت بزم او یله اماملرده واردر اعتقادی بنده هیچ بر
وقت اولماش ایسه ده، لکن ایکی هفته صبر ایدر قدر
عقل او یله اماملرک هر برنده واردر خیالنده ایدم. او یله
اماملر آراسنده املاسی درست، همده سوز آکلار بر آدم

شاید بولنور املنده ایدم.....

رحمت الهیه عمومیتی حقنده بنم اعتقادم علیهنه مجلسلرده
بازارلرده طلوش کوناره چک امام افندیلره انصاف یولنده بنم
بر سوزم وار:

عالم انسانیتنڭ استقبالننه معلق اولان شو مسئله
اگرده اهمیت سز ایسه، محترم امام افندیلر او یله بیهوده
مسئله لرله عزیز وجودلرینی یورماسونلار. اگرده او مسئله
بیوک اهمیتلی بر مسئله اعتقادیه علمیه ایسه، او وقت

و اذا ما خلا الجبان بارض

طالب الطعن وحده والفرالا

کبی بیوک دنائندن صاقتمق ایچون، بنم علمیهده
سویلنور او سوزلری بن یوق ایکن سوبله مهسونلر.

بلسکه او مسئله بی مذاکره ایچون بر «مجلس علما»
عقد ایتسونلرده بنیده اورایه دعوت ایتسونلر. بن اوز
دعوامی اثبات ایچون قرآن کریم دن متعدد آیتلر، کتب
سنندن متعدد حدیثلر سرد ایدرم انشاء الله.

قرآن کریمک هیچ برکلمه سنه دست تأویل اوزانماق
شرطیله، کتب کلامیهده مذکور مسئله لری قرآن کریمک
دلالتلرینه حاکم ایتمه مک اساسیله مجلسده سوز سویلنور.
مجلس آش مجلسی دگل عمومی بر علمی مجلس اولور.
غیرتلی امام افندیلر یا بنم شو عرضی قبول ایدرلر،
یا خود مجلسلرده بیهوده سوزلرله عزیز وجودلرینی یورمق

زحمتندن خلاص اولورلار.

کورهیم بزم غیرتلی دیانتلی امام افندیلر بنم شو عرضی
نصل تلقی ایدرلر. نصل اولور ایسه ده، ایندی بوندن صوڭ،

فمن شاء فليقبل ومن شاء فليقل

خلاف الذي قلناه «لا حرج في القول»

۳

رحمت الهیه عمومیتی حقنده براهینیم.

ارید اری دین النبی محمد

يقام، ودعوى المبطلين تزول

فلنم ار الا الزور يغلو، واهله

يعزون؛ والدين القويم ذليل.

فيا اهل دين الله سمعاً لناصح،

شفیق. فأتباع الرشاد قليل.

لينمى بيت الدين، والبيت ساقط

فجد وتوكل. فالاله كفيل

اسلامیتڭ، کلوب کتمش یاخود شو کونه قدر قالمش

دیگر ملل سماویه به نسبتله، غایت گوزل بر فاچ مزایاسی
واردر.

اڭ اولگیسی: اسلامیت ازلیت طرفنه نظر ایدر

ايكن، مقدم كلوب كنەش ملتارڭ ھر بىرنە لا اقل بىر نبى
 ديشان مبعوثيتنە قطعاً ايمان ايدوب ھر بىر ملتارڭ دينە
 قانونلار يەنە كىبارلار يەنە غايەت بىوك احترام كوز يە نظر ايدىر.
 يهود كىبى ملك هم نبوتى يالكنز كندولار يەنە حصر ايتەك
 ادعاسنە اولمايوب، نصارى كىبى دە حضرت آدم عليه
 السلامدن حضرت عيسى عليه السلام موتەنە قدر كلوب
 كەمش انسانلار هم دە عموماً نبيلر جەنم دە ايدىلر اعتقاد
 ايتەمە يور. شو ايكي ملت كىبى، اول دە كلوب كەمش
 بىوكارڭ هم دە نبيلرڭ مقدس محترم عرضلار يەنە طوقنوب،
 ملتاردن بىر يەنڭ حسيات دينيە سنە آغير كلە بىلە چك سوزلار
 حكايەتلرى كەب دينيە سنە فاتمايور.

يعنى اسلاميت ديگر ملتارڭ ھېچ بىرىنى قىلبادە فعلا دە
 تەحقير ايتەمە يور ايدى. كلوب كىدن ھەم ملتار ھەم انسانلار
 ايچون بلا تەديد بىدل اولنەمش فضائل الھيەبى مغروريتلە
 يالكنز كندوسنە استىثار ايتەك دعواسى دە اسلاميت دە يوق
 ايدى.

اسلاميت اوزى دە رحمت الھيە قدر كىڭ ايدى. او
 قدر كىڭلىكنە كورە دە اللە رب العالمين حضرتلرى طرفندن
 اسلاميت عالم انسانيت ايچون عومى ھەم دە مؤبد اولاقچ
 بىر دين اولاق صفتيلە سيدالوجود محمد عليه السلام حضرت
 تلىرى واسطە سىلە قرآن كرېم دە تەرىفى تەغىيرى مەمتەنە نظم
 مەجزلە بيان قىلىندى.

اسلاميتك شو فضيلت مميزاتى عالم انسانيت ده
 اسلاميتك غايت سريع صورتده انتشارينه فوتلى بر سببده
 اولمش ايدى. لىكن اسلاميتده او كىكللك او قدر اوزاق
 دوام ايدى، كىك كوينچه اسلاميتى اوزارينك طار فكر -
 لرنده غايت طار كوكللرنده اورونلاشدرمق دن انسانلرك
 اكثرى عاجز قالدى. زيرا چارهسز يا اوز كوكللرينى
 توسيع ايتىك، ياخود اسلاميتى اوزارينك كوكللرى قدر
 اك طار بر «لاشى» ايتىك مجبوريتى وار ايدى. فقط
 اولىكى دن، يعنى اوز كوكللرينى توسيع ايتىك دن عاجز
 قالمش انسانلر، ايكنچى دن يعنى اسلاميتى طار ايتىك دن
 قورقماديلر. او زمانك احوال سياسيه سى ده بوكا مساعده
 ايتىدى.

شو حالك تاثيريله طار كوكللر قدر طار غايت اوفاق
 منهبىلر عالم اسلاميتده قيصه بر مدت ايچنده كىرتله وجوده
 كلدى. معقولات دائره سى قدر كىك اسلاميت اويماق
 احاطه سى قدر گنه تنگ قالدى. اسلاميت همه عالم انسانيتى
 جمع ايدى بيلمك دگل، اوفاق بر قريه ده طوپلانمش كوچك
 جماعتى ده دائره اماننه آلاماز اولدى. اسلاميت «يا فلان
 اوغلى فلان كىي اعتقاد ايت ياخود مؤبد صورت ده جهنم ده
 يان! جانك ده مالك ده حلال! . . .» كىي اك بيوك ظلم اك
 بيوك جهل اساسنه بنا قىلنمش بر جزئيه دن عبارت قىلندى.
 عاقبت، اسلاميت - ار باب عمائمك كىفى هوالر ينه خدمت

ايتنرمك قصديله غايت قبا بر قورال صورتنده افراع اولندى .

شو حالك سؤتاثيرلر ينى صايوب بتورمك ممكنيدىر ؟ فقط شېبه يوق ، عالم اسلاميتك باشنه كلمش سياسى اجتماعى بليهلر ك عموما هر برينه شو حال سبب اصلى اولمشدر . بن شمدى ازليت طرفنه اسلاميتك نظرى حقنده شو قدر سوزلر مل اكتفا ايده بيلورم . زيرا بوندىن زياده شى بنم مقصدمدن غار جدر .

اصل مقصدم : ابديت طرفنه ، يعنى عموم عالم انسانيتك حيات استقباليه سنه اسلاميتك نظرى حقنده على التفصيل سوز سويله مك ايدى .

شو حاضرگى دقيقه دن اعتبارا ازليت طرفنده وجودك انتهاسى عقلا ده سمعاده ممكن اوله بيلور ايسه ده ، عالم وجودك ابديتى طرفنده نهايت البته بلا خلاف يوقدر . ابديت طرفنده بلا انقطاع ، وجودك دوامى اخبار سماويه ايله ده صحيح عقولك اجتماعيله ده شېهه سز صورتك ثابت اولمشدر . « ابديت طرفنده نهايت يوق ! » ديمك كى بر قدر

تأمل قيلنور ايسه ، غايت دهشتلى بر تعبيرك معناسى نه در ؟ . استقبال ده نهايتى يوق ابديت — او قدر بيوك او قدر واسع غير محدود زمانلردن عبارتدر كه مليون دفعه مليار عصرلر او زمانلره نسبتله بر سه كوند قدرده اولاماز ؛ بلكه رياضى مقدارلر ك همه سى جمعاً ابديت عظمتنه اتساعنه

نسبتله محسوس دگل غایت حقیر بر مقدار اولور قالور .
 « یتخافون بینهم أن لیثتم الا عسرا . نحن اعلم بما
 یقولون اذ یقول امثلهم طریقه ان لیثتم الا یوما . » (طه -
 ۱۰۳ - ۱۰۴)

استقبال ده نهایتی یوق ابدیته نسبتله شو بزم
 دنیا مزلک عمری ده محسوسیت درجه سندن دون غایت
 حقیر بر مدتدن عبارت اولور .

« ولله غیب السماوات والارض . وما امر الساعه الا
 کلمح البصر او هو اقرب . ان الله علی کل شیء قدیر . »
 (النحل - ۷۷)

انسانلرک طبیعی عمرلرینی آلتمش یتمش سنه قدر
 اعتبار ایدر ایسه کده ، خلاف معتاد اولارق بر انسانک
 عمری یوزلره ایریشور ایسه ده ، بقر تقدیر انسانلرک
 عمری دنیا عمرینه نسبتله کذلک محسوس دگل عاشره کبی
 بر لجه دن گنه عبارت اولور قالور

شو دنی دنیاده ابتدای خلقت دن شو دقیقه یه قدر
 کلوب کتمش انسانلرک اکثری ، شبهه یوق ، اولزریزک
 بر لجه کبی اولان عمرلرنده راحتلرینه نسبتله دهها زیاده
 مشقتلر کور مشلر در .

بر لجه کبی اولان عمرلرنده خالص راحت یوزی
 کورمه مش مسکین انسانلر ، ریاضی مقدارلرک هچ بریل
 تحدید قیلنه ماز ابدیت طرفنده ، نه قدر قاسی اولور ایسه ده

هیچ بر انسانك قلبی تصویرینه طاقت قیلاماز درجه ده
 دهشتلی عذابله مؤبد صورته معذب اولاجق لار ایسه ،
 یا او وقت غفور مطلق ارحم الراحمین الله رب العالمین
 حضرتلرینك رحمت مطلقه سیله ، مغفرت عمومیه سی نره یه
 کتمش اولور ؟ یالکیز بر لجه کبی اولان مدته گنه راحت
 ایدوب ده ملیارد ملیارد قدر عصورلرده دهشتلی صورته
 عذاب ایدن ذات ، ارحم یا رحیم اولا بیلورمی ؟ او یله
 ذانك انتقامی غضبی قیاس قبول ایتمز درجه ده مغفرتندن
 رحمتندن دها زیاده اولمازمی ؟

بن یالکیز شویله ملا حظه لره اعتماد ایدوب گنه عموم
 عالم انسانیتك نجاتیله حکم ایتمش اولسه م ایدی ، عالم
 انسانیت مؤبد صورته البته معذب اولور اعتقادنده اولان
 انسانلرک خدایی تعظیملرندن تقدیسلرندن بیك دفعه زیاده
 الله رب العالمین حضرتلرینی تعظیم و تقدیس ایتمش اولور
 ایدم .

دیگر ملتلرک هر بری استقبالدده نجاتی بیوک مغرور -
 یتله یالکیز کندولرینه حصر ایدرلر ایکن ، ابدیت طرفنده
 عومما عالم انسانیتك نجاتی اسلامیت اعتقادی قیلنه بیلور
 ایسه ، او یله عالی بر اعتقاد اسلامیت ایچون غایت بیوک
 بر فضیلت اولمازمی ایدی ؟

شبهه یوق او یله عالی بر اعتقاد اسلامیتك اڭ بیوک
 مزایاسندن ایکنچی سی اولا بیلور .

ألم ده هیچ بر دلیل اولماسه ده ایدی، او یله بیوک بر
 فضیلتی تعالیم اسلامیة اساسنه وضع ایتیمه اسلامیه محبت
 سائقه سیله البته صوڭ درجه ده اجتهاد ایدر ایدم. او یله
 ایسه، ألم ده غایت واضح براهین وار ایکن، ایندی بن نیچون
 سکوت ایدهیم؟

عالم انسانیتک حیات استقبالیة أبدیه سنه عائد او بیوک
 مسئله یی بندن مقدم علمای اسلامک الک بیوک لری کشف
 ایتمشلر ایسه، او مسئله ده او یله بیوک لره اقتدا اینمک شرفی
 ده بکا کفایه ایدر. ا گر مسئله یی بندن مقدم هیچ بر آدم
 سویله مه مش ایسه، یا خود سویله یوب ده اثبات ایده مه مش
 ایسه، بلکه او مسئله یی بالکثر بن ابتداء ایتمش ایسه،
 اثباتیچون ده براهینی بالکثر بن گنه بولمش ایسه، بنم
 ایچون بوندن بیوک بر شرف حاجت دگل! بن او یله بر
 شرفله شو دنیادن قناعت ایدرم.

خامش، حافظ! که دست غیب ناکاه

چنان سازد که خواهی روزی شادی!

ایشته بن یا اتباع یا خود ابتداء شرفنه نائل اولوق
 قصیده، قلبه ده متمکن بر اعتقادی عهومک مطالعه سنه عرض
 ایتدم. دورت بش آدمک تهمتی کبی، او مسئله ده بر فتنه
 احتمالی یوقدر. شو ساعت ده بنم قلمهله او مسئله عهومه
 عرض اولنماسه، یارین شبهه یوق، او مسئله دیگر بر آدم
 همیتله عهومک فکرینه عرض اولنه جق.

همه کارم زخود کامی بید نامی کشید آخر!

نهان کی ماند آن رازی کز وسازند محفلها ۱۹

«عالم انسانیتك حیات استقبالیه سنده رحمت الهیه
عمومی بولور می؟» یاخود «انسانلرک اکثری رحمت الهیه دن
مؤبد صورتده مجروم قالورلر می؟» مسئله لری نه عائد سوز
لری کتب کلامیه ده، تفسیرلرده اهل کلام اوزانه شلار
ایدی. مذاهب نه قدر مختلف اولمش ایسه ده سوزلر نه
قدر چوق سویلنمش ایسه ده، کتب کلامیه عموماً «رحمت
الهیه یالکیز مؤمنلره؛ ایمس در کافرلره» اعتقادنده اجماع
ایتمشلر ایدی. هر کس ده ایمانی یالکیز کندوستنه حصر
ایدوب «رحمت الهیه یالکیز بگا اولور» اعتقادنده ایدی.
بوکا قریب اعتقاد عالم اسلامیت ده هر آدمده شو کونه
قدر دوام ایتدی؛ کتب کلامیه اوز طرفدارلری نه جنت ایچون
خط سعادت؛ جهنم دن خط برأت و یروب، مخالفلری نه عموماً
خط شقاوت و یرمکن، یعنی جهنم بولنه مرور تذکره لری
یازمق دن دیگر بر شی بیلیمه یور ایدی.
اهل کلام اوز نوبتلرنده سوزلری نی سویله دیلر ،
نوبت شمدی بزه کلدی.

دور مجنون گشت؛ ونوبت ماست

هر کسی پنج روز نوبت اوست

دلا، طمع مبراز لطف بی نهایت دوست

فکر هر کس بقدر همت اوست.

بوندن صوځ سرد قیانه چی برهانارمه بر مقدمه قیلمق
فصدیله بن بوراده کتب کلامیه ده بیان قیلنمش بر مسئله یی
مخا کمه سیل نقل ایده ییم: اهل کلام اثابه، عقاب مسئله سندن، یعنی
طاعت ایچون ثواب ویرو، معاصی ایچون ده عذاب ایتو
مسئله سنده، مختلف مذهبله ذاهب اولمشلر ایدی.

اوزلرینه اهل السنة والجماعة اسمینی تخصیص ایدن
اشاعره ماتریدییه کبی مذهبلر «اثابه ایله عقابک هیچ بری
واجب علی الله دگل؛ بلکه اثابه بر فضل الهی، عقاب
ایسه، بر عدل الهیدر؛ کفردن ما عدا هر بر گناهی اوز
اراده سیله خدای عفو ایده بیلور؛ نصوص سماویه ظاهرینه
کوره کفری عفو ایتنک اصلا ممکن دگلدر» دیرلر ایدی.
بزم کتب کلامیه ده هم ده کتب اصول ده «معتزله»
نامیله یاد اولنور بر بیوک مذهب وارد. او مذهب اربابی
کندولرینه «اصحاب العدل والتوحید» نامنی ویرورلر.
او مذهب موجدی - علوم سندن امامتیه: خطبه لرنده
وعظلرنده بلاغتیه مشهور، اسمی عالم اسلامیت ده اک
محترم حسن البصری حضرتلرینک اک بیوک تلمیذی واصل
بن عطا حضرتلری ایدی. شو محترم امام واصل حضر-
تلی ده عقل ده علم ده اخلاق ده حسن الصبری حضرتلر-
ندن بر نسخه کبی اولوب علی الخصوص بلاغت بابنده
اک برنجیلک رتبه سنه چیقمش ایدی.
ایشته شو محترم امام واصل بن عطا حضرتلری اثابه

عقاب مسئله‌سندہ استادی حسن البصری رأیندن اعتزال
ایدوب، غایت غریب بر مذہب ایجاد ایتدی . او مذہبہ
کوره « طاعتلره ثواب ویرمک، گناہلر ایچون ده عقاب
ایتمک واجبدر؛ عداک اقتضاسی شودر » ایمش !

« طاعتلره ثواب ویرو واجبدر » سوزینک قصوری،
بر قدر تأمل قیلنور ایسه، ظاهر اولور. زیرا همه عالم
وجودک ذرہلرینه قدر مالکی اولان قاهر مطلق الله حضر-
تلرینه عقلا بر حق ایجاب ایتمک صریح عقلک خلافیدر .
شوقدر واضح بر حقیقت ده سوزی اوزاتمایوب امام اسلام
فیلسوف ابوالعلا حضرتلرینک « اللزومیات » نده ذکر
اولنمش ایکی بیتى بوراده بر مناسبتله نقل ایدهیم :

والغیر یفعله الکریم بطبعه
واذا اللّٰهیم سخا فذاک تکلف
نرجو من الله الثواب معاریا
وله علینا من القدیم تسلف

شو ایکی بیتى معناسیلہ ملا حظہ ایدن هر بر عاقل،
اوزینک غایت جزئی طاعتلری ایچون مؤبد صورتده جنات
عالیهی ایجاب ایتمکدن گنه دگل، حتی طلب ایتمکدن بیله
البته اوتانور. بز عقل صریحک ارشادیلہ مهتدی اولور
ایسهک آکلارز : بزه دنیاده نصیب قیلنمش هر بر لقمه
هر بر شربه بیوک بر فضل الهیدر. بزم وجودمژده بزم
حیاتمژده، بزم طاعتلرمژده همهسی بزه خدای طرفندن بذل

اولمش بيوك نعمتلردر. بيك دگل ميليمون فصورى وار
طاعتلرمز مقابلنده الله رب العالمين حضرتلرينه جنات عاليه
ايجاب ايتمك، اگرده غايت بيوك حماقت اولماز ايسه،
البتہ خداڭڭ الطاق غير متناهيہ سنه. محدود دگل كرمنه
اعتماد ايتمك سببيله انسانڭڭ قلبنه استيلا ايتمش بيوك بر
مغروريندر.

بن شويله ملاحظه لره طالورم ايكن، اهل كلامڭ
غايت بيوك جسارتلرندن، تعبيرمى عفو اينسونلر، غفلتلر-
ندن ادبسلكرنندن فوق العاده تعجب ايدرم
فيلسوف شاعر مشهور سعدى حضرتلرى ديمش:

از دست وزبان كه بر آيد
کز عهد شكرش بستر آيد.
بنده همان به كه ز قصير خريش
عذر بسترگاه خداى آورد.
ورنه سزاوار خداوندش
كس نتواند كه بجاي آورد.

اشنه الله رب العالمين حضرتلرينڭ عظمتنه مناسب
ادب شودر! بويله ادب البتہ ملا جلال، تفتازانى كى كتب
كلاميه ده بولنه ماز؛ بونگچون گلستان، ديوان حافظ كى
كتب ادبيه لارمدر.

وجوب اثابه بطلانى حقنده شو قدر سوزله اکتفا
ايدوب، وجوب عقاب حقنده اهل كلامڭ سوزلرينه ايندى
نظر ايدوبك:

اشعر یلر ماتریدیلر توبه سز مغفرتک جوازینی کفردن
ماعد اولان گناهلره حصر ایدوب، کفر ایچون عقاب البته
واجبدردیدیلر؛ اما واصل ابن عطا حضرتلری همده اتباعی
کبائر ده کفر کبی حساب قیلوب، بیوک گناهلرک هر
بری ایچون البته عقاب لازمدر اعتقادنده ایدیلر.

کبائر بر طرفه برافوب، کلامزی «کفر ایچون
وجوب عقاب» مسئله سنه حصر قیلایق. زیرا الک اصل مقصد
شو مسئله یی حل ایتمکدر.

«کفر ایچون عقاب واجبدر» سوزنده وجوبدن
مراد نه در؟

شارع خطابیلر انسانلر ذمه سنده بر شی واجب اولا
بیلور. لکن شو معنی ایله وجوب قاهر مطلق الله حصر-
تلری حقیقه شبهه یوق هیچ بر صورتده ممکن اولاماز.
زیرا شو معنی ایله وجوبی دعوی ایتمک ایچون ده
بیوک بر غالب اعظمک وجودینی دعوی ایتمک لازم اولوب
کلور ایدی.

الله عز وجل حضرتلری حقیقه او معنی ایله وجوبک
عقلا همده شرعاً امتناعی قطعی صورتده معلومیتنه کوره،
کلامیون اوز دعوالرینی بر قدر معقول اولا بیلور طرزده
کوسترمک ایچون ایکی نوع وجوب اثبات ایتیمیه مضطر
اولدیلر: بری «وجوب علیه» دیگر ده «وجوب منه»
دیدیلر. «یجب علی الله» دیمک ایچون دیگر بر ذات

طرفندن امرک نزولی لازم کبی ایسه ده، «یجب من الله»
 دیمک ایچون دیگر بر ذات طرفندن امرک نزولنه اصلا
 حاجت یوقدر، بلکه الله عز وجل حضرتلرینک اوز حکمیل
 اوز التزامیل بر شی اللهک اوزینه واجب اولا بیلور
 دیدیلر. وعید حقنده وارد «ان الله لا یغفر ان یشرک به
 ویغفر ما دون ذلك لمن یشاء» (نساء ۴۷) - «قال لاتختصموا
 لیدی وقدمت الیکم بالوعید. ما یبدل القول لیدی. وما انا
 بظلام للعبید» (قاف - ۲۸ - ۲۹) کبی آیتلرله کبائر هم
 کفر ایچون عقاب ایتمک الله حضرتلرینک اوز حکمیل
 اوزینه واجب اولور ایسه، ممکندر، بلکه عقاب البنه
 واجبدر، عفو ایتمک قطعاً حرامدر؛ زیرا کبائر یا کفر
 عفو اولوب عقاب واقع اولماز ایسه، او وقت اخبار
 سماویده عمومأ، قرآن کریم ده خصوصاً متعدد محللرده
 کذبک وقوعی لازم اولوب کلور؛ وعیدده خلف ایتمک،
 سوزی ده یالان سویله مک الله تعالی حضرتلری حقنده عقلا
 ممتنعدر دیدیلر.

کتاب کلامیه بی کتب تفاسیری صوکت درجه اجتهدله
 الک بیوک بر تفتیشله مطالعه ایدن هر بر منصف آدم
 بیلور؛ شمدی بیان قیلنمش دلیل وجوب عقاب مسئلسنده
 کلامیونک آنده بولنه بیلور دلیللرک الک قوتلی سیدر؛
 بوندن دها قوتلی بر دلیل کلامیونک آنده یوقدر.
 اشته، اگر بن اهل کلامک شو دلیللرینی هدم ایده

بیلور ایسه، اوقت اوزدعوامنی برهانلرمله اهل کلامک
هر برینه الزام ایده بیلورم.

بن اهل کلامله مناظره ایدر ایکن، اهل کلامک اوز

مسلکارینه سلوک ایتسه ایدی، اهل کلام کبی آیتلری

تأویل یا تخصیص ایتیه تنزل کوسترسه ایدی، البته وعید

آیتلرینک هر برینی مغفرت یا رحمت آیتلریله تأویل یا

تقیید ایدر ایدم. یاخود وعید آیتلری خبر دگل، انشادر؛

خلافی واقع اولور ایسه، کذبک وقوعی لازم اولوب کلور

دیر ایدم. یا ایسه «الم تعلم ان الله له ملك السماوات

والارض. يعذب من يشاء ويبغفر لمن يشاء». والله على كل

شیء قدير» (مائده - ۴۰) کبی قرآن کریمده متعدد سوره

لرده وارد آیت کریمه لرله وعید آیتلرینی اللهک مشیتیلله

تقیید ایدوب، وجوب عقابی البته رد ایدر ایدم. یا ایسه،

«قل يا عبادي الذين اسرفوا على انفسهم لا تقنطوا من رحمة

الله. ان الله يغفر الذنوب جميعاً. انه هو الغفور الرحيم»

(الزمر - ۵۳) کبی محکم همده عمومیتی مؤکد آیتلری وعید حقنه

وارد ظاهر آیتلره تعارضلری صوکنده ترجیح ایده بیلور ایدم.

اهل کلامک خاطری ایچون کنه شو مسلکاره سلوک

ایده چک اولسه ایدی، البته او مسلکارک هر بریله

کلامیونک دلیللرینی جرح ایتیه بنم حقمی کلامیونک اوز-

لریده تسلیم ایدرلر ایدی. لکن او بیه مسلکاره سلوک

ایتیه بنم احتیاجم یوقدر. زیرا ائ بیوک دلیللری ده بنم

نظر مده غایت ضعیف اساس اوزرینه بنا قیلنمش در:
 اهل کلام خلق ایتمهکله عفو ایتمگی، همده تجاوز
 ایتمهکله بالان سویله مگی فرق ایده بیلسه لر ایدی، حدودی
 بوق بیوک زلتاره مرتکب اولمازلار ایدی. خلق ایتمک
 عقلاده شرعآده مذموم ایسه ده، لکن عفو ایتمک مکرم
 اخلاق ایتمک بیوکلرندندر: بالان سویله مک ایتمک بیوک عیبدر،
 لکن موآخذه ایدرم سوزندن تجاوز ایتمک ایتمک بیوک بر
 کرمدر.

الله قرآن کریمده «وما ارسلنا من رسول الا بلسان
 قومه» دیمش. وعید آیتلرینک هر برسی ده قرآن کریمده
 لسان عربیله کلمشد. عربلرک لساننده عرفنده عفو ایتمک،
 موآخذه دن تجاوز ایتمک هیچ بر وقت کذب دن عذ قیلنما یور.
 عرف عرب ده موآخذه دن تجاوز ایتمک، جانیلرک جنایتلرینی
 عفو ایتمک ایتمک محمود ایتمک عالی فضائل دن حساب قیلنور.
 اهل کلام وعید آیتلرندن وجوب عقابی فهم ایتمشلر
 ایسه، بن رحمت الهیه اتساعنه اعتماد ایدوب، عرف
 عربک دلائیل، البته یوم قیامت ده الله هر بر انسانک
 گناهندن تجاوز ایدر اعتقادنده اولور ایسه م، الله رب
 العالمین حضرتلرینک حضورنده دها ادبلی صورتده حرکت
 ایتمش، همده قرآن کریمی دها گوزل آکلامشی اولورم.
 فتوحات مکیه صاعبی محیی الدین بن عربی حضرتلری
 فتوحاتک ۷ نچی جزئنده (۵۱۷) صحیفه سنده دیمش: «وقد

زل هنا اهل الكلام زلة عظيمة اوقعها في ذلك استعالة
الكذب على الله في خبره . وما علموا ان مثل هذا لا يسمى
كذباً في العرف الذي نزل به الشرع . فقد حجبهم دليل
عقلي عن علم وضع حكمي . وهذا من قصور بعض العقول
ووقوفها في كل موطن مع ادلتها . ولا ينبغي لها ذلك .
ولتنظر الى المقاصد الشرعية في الخطاب ، ومن خاطب ،
و بآي لسان خاطب ، و بآي عرف اوقع المعاملة في تلك
الامة . يقول بعض الاعراب : «واني اذا اوعدته او وعدته
لمخلف ابعادي ومنجز موعدي» . ولا يقال ان الله اخلف
بل يقال انه عفا وتجاوز عن عبده . «

علمای اسلامك بيوكلرندن امام يعينى بن معاذ حضر -
تارى ديمش : «الوعد والو عيد حق . فالوعد حق العباد
على الله . حيث ضمن لهم انهم اذا فعلوا كذا ان يعطيهم كذا .
ومن اولى بالوفاء من الله . والو عيد حقه تعالى على العباد .
اذ قال لا تفعلوا كذا فاني اعذبكم ان فعلتم كذا ففعلوا
فان شاء عفا وان شاء اخذ . لانه حقه . واولا هما العفو
والكرم لانه غفور رحيم . «

اهل كلامك دليملرينى جرح مقامنده شمدى شو دفعه
بالكز شو قدرله اکتفا ايدرم . بوندن صوگ ، انشاءالله
قرآن كريم دن من غير تاويل آيات بيناتي كوزى وار
آدملره عرض ايدرم . قرآن كريمى اقوال كلاميه ايله تفسير
ايتميه عادتلهشمش امام افنديلرك امراض قلبيه لرينه شايد

بر قدر شفا ویره بیلورم انشاء الله .
 اوزارینک احاطه سنه داخل دگل هر بر حقیقنی انکار
 ایدن امام افندیلر آکلار ایسه لر، شو بیتلری انشاد
 ایده ییم :

وان تسکن قاصرا عن کونها ثبتت
 فیما حوی شرحه الحفاظ فی الورق
 فاعرف مقامک فی درک العلوم ، ولا
 تعرض لمن خاض فیها شاسع الشقق
 فانت ویحک فی وهه العضیض . فلا
 تمدد یسدیک لمأری فارق العنق
 ما الدین الا الذی تسعی لتوهنه
 آی الکتاب و آثار النبی العتق
 لا کل خبط عن الیونان مبتدع
 قد دس بین اصول الدین مختلق
 تعمی قواعد رسطالیم تحسبها
 دیناً . لك الویل نبهناک فاستبق
 ان کنت توردد ردا او معارضة
 لها سردناه فاذا کر ماتری وسق .

استطراء

۴

رحمت الهیه عمومیتی حقننده برهانلرم

عیب حافظ گو مکن واعظ که رفت از مذهبم
پای آزادی نبندد، گر بجایی رفت رفت.
پیا، و معرفت از من شنوکه در سخنم
ز فیض روح قدس نسکتہ استفاده رفت
همه انسانارک عقیده الهیه برینی تصویب ایدر
لسان القیب خواجه حافظ شیرازی حضرتلری.

دوستلرم قردشلم! سز ملالرغه شهیتگر:
شو ایکی یولنی مینی کومگاچ اوقورلر قبرمه.
اهل تکفیر برعجلانسون کوروب آتق سوزم:
«کور» نهرسمه طولغان ایمان ایله قرآن صدرمه!»

شاعر ملی مز ادیب محترم
عبدالله افندی توقایفی.

من ینازعنی فیما افوه به * فالناس کلهم اعداء ماجهلوا.
ابدیت طرفنده همه عالم انسانیتک نجانه یقینا
ایمان ایدن موسی جارالله بیگیفی.

«ابدیت طرفنده نجات عمومی» مسئله سنک «شورا»

صحیفه لرنده انتشاری مناسبتهل بنم دوستلرم خیر خواهلق
بولنده شفاها یا مکتوبله بگا :

«وقتسز همده اورنسز ، فائدهسی یوق بر مسئلهیی
چهاردڭده ، فتنه لار قوباردڭ. دینلی امام افندیلری ده بیهوده
یرده زحمتلره صالدڭ. سنی تکفیر ایدرلر ، عاقبت مدرسه دنڭ
طرد ایتدرلر ! بر آز سیاست قوللانمق ، بر قدر ناقتیه
ایله حرکت ایتمک سکا لازم ایدی . کله جک سنه ده مدرسه
وقفیه سنده اوزڭ ایچون بر تأمین حاضر له مک یولنده حرکت
ایتسه ڭ یاغشی اولور ایدی . » معناسنده اولان سوزلری
سویله دیلر یازدیلر .

نصیحتلریچون دوستلرمه البته تشکر ایدرم . لکن
بن هیچ بر وقت افکار علمیه مهده حریمتی انسانلر خاطر ایچون
یا خود سنوی معاشم ایچون فدا ایده مم . بر حقیقت ، برهانلریله
کوڭلمده رسوخ بولور ایسه ، انسانلر بونی تحمل ایده مم
خیالیله ، بن او حقیقتی کتم ایتمک رذالته تنزلده ایده مم .

رقیم سر زنها کرد که از این باب رخ بر تاب

چو افتاد بر سر مارا که خاک در نمی ارزد

چه حافظ در قناعت کوش و از دنیای دوز بگریز

که یک جر منت دوزان بصد من زر نمی ارزد .

افکار ڭ حریمته یول باغلامق ایچون گنه کوسترامش
حرکتلره ، هر بر مسئلهیی اوزلری ڭ گنه ایمانلریله فکدرلریله
تحدید ایتمک یولنده بذل اولنمیش غیرتله بر قیمت ویره -
میوب ، بن همان اوز دعوامی اثبات صد دنده ثبات ایدرم .

بیلاورم: بنم دعوام ثابت اولور ایسه، اسلامیت
بوزینه بر جمال اولاق؛ همه ادیان آراسنده اسلامیتک
قیمتی علویتی دها زیاده لسه چک؛ «نجات یالکز بکادر!»
کبی مغروریت اوزرینه تأسیس قیلنمش اعتقادلردن اسلام
میتک ایمانی پاک قالاق؛ اسلامیتک حقیقی جهنمدن تخویف
طریقله دگل، قرآن کریمده نظم الهیله بیان قیلنمش برهان
لرله اثبات قیلنه چق...

دینلرک تاریخده یاوروپا اهل علمی قلمیله تألیف
قیلنمش اوفاق بیوک کتابلردن بعضارینی مطالعه ایتمش ایدم.
او بیوک پروفه سورلرک حکیملرک اتخاذ ایتمش مسلکلی،
اوزلریزک دینلردن ما عدا دینلره نظرلری بکا بر قدر
غریب کورنمش ایدی. خصوصاً یهودیتی اسلامینی بوددیگی
بیان ایدرلر ایکن، پروفه سورلرک قلملریله یازلمش سوزلر
— شو اوچ دینک تعلیملرینه بر قدر واقف انسانلری البته
بر قدر متأثر ایدر درجهده حقانیتدن بعید ایدی. تاریخ
اسلامینی یازارلر ایکن، نصرانیت علماسی طرفندن نبی اسلام
علیه الصلاة والسلام حضرتلری علیهینه سویلنمش سوزلری
بوراده ذکر ایتیمه حاجتده یوق.

پروفه سورلری رد ایتمک جسارتیله دگل، یالکز حقیقتی
بلاتحریف میدانده قویوق قصدیله، اسلامیت حقنده بر شی
یازوب طاشلامق امنیه سی بنده وار ایدی. حقائق مطلقه یه
همده قرآن کریمده کلمش تعالیم عالییه استناد ایدوب،

اقتدارم مساعده سی قدر، یا وروپا علماسی طرفندن سویلنمش سوزاره مقابله ایتمگی کندومه واجب بیلمش ایدم.

شوسنه مدرسه حسینیه ده تاریخ ادیان درسلی مناسبتیله تاریخ ادیان بحثلرینی او فکر مک فعلیتی ایچون بر مناسب فرصت صایدیم. دیگر باحثلر کبی یا او، یا بو طرفه میل ایتمه مک ایچون، دینلری بلا تعصب بیان ایتمگی التزام ایده جک ایدم. شو التزام قوری بر لاف اولماسون ایچون ده، هر بر دینی تصویب ایتمک حقنده من القدیم کوکلم ده رسوخ بولمش اعتقادمی مقدمه صورتنده عرض ده ایتمش ایدم، عین شو ملاحظه ایله «ابدیت طرفنده رحمت الهیه عمومیتی» حقنده علمای اسلامک آثار عالییه سنده بیان اولنمش مسئله بی ده میدانیه قویوب، او مسئله بی آیات قرآنیله ایله اثبات ایدرم انشاء الله دیمش ایدم.

بونلارک هر برندن ده مقصد - شأ کردلرله بلا تعصب تاریخ ادیاندن بحث ایدوب، مقایسه اصولیه، اسلامیتک افضلیتنه یاشلری ارشاد ایتمک ایدی.

«کاری که کرد دینء ما بی بصر نکرد»

احوال زمان شاگردلرله اشتغال مزه مساعده ایدرمی یوقمی معلوم دگل، لکن یوقاریده سویلنمش مقصدمی بقدر الامکان تعقیب ایدرم.

شمدی رحمت الهیه عمومیتی مسئله سنده برهانارمی سرد
ایتمیه نوبت کلدی . او برهانلرمی برر برر بیانندن قبل
«انسانلارک جهنمده خلودلرینه» دلالت ایدر آیت کریمه لر
حقنده فکرمی علی الاجمال عرض ایتمک لازمدر . زیرا ابدیت
طرفنده نجاتی یالکز کندلرینه حصر ایدن مذاهب کلامیه ،
همده بنم دعوامی قرآن کریمه قطعاً خلافدر دیمش ملالر
یالکز او آیت کریمه لره استناد ایدرلر .

قرآن کریمده عذاب آیتلری «يعذب من يشاء ويغفر
لمن يشاء» کبی اکثریاً مشیئت ایله تقید قیلنمشلار .
الاعراف سورهنک ۵۶نجی آیت کریمه سنده صاحب التوراة
نبی محترم موسی علیه السلامه خطاباً اللہ رب العالمین حضر-
تلی «قال عذابی اصیب به من اشاء . ورحمتی وسعت کل
شیء» دیمش . بوراده ، اولاجق ایسه ، مشیئت ایله عذاب
اولاجقی بیان قیلنوب ، عاقبت همه انسانلره ، یالکز انسانلره
دگل بلکه همه شیلره رحمتک عمومیتی غایت واضح بر خطاب
الهیله بیان قیلنمش .

عذابک اوزی مشیئت ایله مقید اولور ایسه ، البته
عذابده خلود ، عذابک ابدیتی قطعاً مشیئت ایله مقید اولور .
الانعام سورۃ جامعہ سنده (۱۲۸)نجی «قال النار مثواکم

خالدین فیها الا ما شاء الله» آیت کریمه سنده وارد اولمش
استثنا کبی استثنای قرآن کریمه متعدد آیتلرده وارد اولمشدر.
هود سوره سنده (۱۰۶-۱۰۷) (فاما الذین شقوا ففی
النار لهم فیها زفیر و شقیق. خالدین فیها ما دامت السماوات
والارض. الا ما شاء ربك. ان ربك فعال لما يريد» آیت
کریمه لرنده هم استثنا همده خلودی کوکلرک برک دولمری
مدتبله تقیید وارد اولوب، ابراهیم سوره سنده (۴۸)نچی
«یوم تبدل الارض غیر الارض والسماوات» آیت کریمه سنده
شو کوکلرک شو برک بر کون فنالری اخبار قیلنمشدر. شو
آیت کریمه ده خلود مقید ایسه، بزه اصولیونک «سبیلاری
حادثه لری بر مطلق مقیده حمل اولنور» قاعده لریله عمل
ایدوب، مطلق ذکر اولنمش خلودلری «ما دامت السماوات
والارض» قیدیله تقیید ایده بلورز.

عذابک اوزی ده عذابک ابدیتی ده مشیئت ایله مقید
اولولار ایسه، قرآن کریمه ده ذکر اولنمش خلود، یا
استثنا یا نهایتی وار بر مدت ایله، مقید ایسه، ایشته
بزم دعوامرک ثبوتنه غایت واسع بر میدان حاضرلندی دیهکدر.
۳نچی بابده کفر ایچون وجوب عقاب مسئله سیننی بر
قدر جرح ایتنمش ایدک. شمدی بوراده عذابک ده ابدیتک
ده مشیئت یا بر مدت ایله تقیدلرینی بر قدر اثبات ایتنمش
کبی اولدق. بزم اشاعره ماتریدیه لر بوکا فناعمت ایتنملر
ایسه، آنلاره الزامی صورتده دها ایکی آیت:

نساء سوره سنده ميراث ده فرائضى بيان صوکنده (۱۳)
نجى آيت کریمه ده الله رب العالمين حضرتلری «ومن يعص
الله ورسوله يتعد حدوده يدخله ناراً خالداً فيها. وله عذاب
مهيّن» ديمشدر.

نساء سوره سنده (۹۳) نجى آيت کریمه ده الله رب
العالمين حضرتلری «ومن يقتل مؤمناً متعمداً فجزاؤه جهنم
خالداً فيها. و غضب الله عليه ولعنه واعد له عذاباً عظيماً»
بيورمشدر.

شو آيت کریمه لرک افاده لرينه کوره، بر مؤمنى
بغير حق قتل ايدن آدم، هم ده ميراث ده الله طرفندن تقدير
اولنمش سهاملری تعدى ايدن آدم جهنم ده خالد اولاجى لار.
لکن بزم اشاعره بزم ماتريدیه شو ايکى حکمى قبول
ايتمه يورلر. اوزلرينک مذهبلىرى صافلامق خياليه او ايکى
آيتى تاويل، ياخود، دها درستى، تحريف ايد يورلر.
بيورسونلر، کوره يک، تاويل ايتسونلر! بزه اشاعره خاطرى
ايچون گنه، کفر حقنده وارد اولمش خلودلری ده اويله تاو
يللر ايله تاويل ايدرز. اوز مذهبلىرى ايچون تجويز
اولنمش تاويللرىنى اشعريلر ماتريديلر شايد کرماً بزه ده
احسان ايدرلر. اگرده تاويللری اوزلری ايچون گنه يارارلق
درجه ده عزيز اولوب، بزه احسان اولنه ماز ايسه، او وقت
بز اوزمک اصل مسلکمه سلوک ايدوب، قرآن کریمى
اصلاً تاويل ايتمه مک طرفنده ممنونيتله فالورز. رحمت الهيه

عموميته مسئله سنده برهانلرمي برر برر عرض ايدهم :
 (١) «قال عذابي اصيب به من اشاء . ورحمتي وسعت
 كل شيء فساكتها للذين يتقون و يؤتون الزكاة و الذين
 هم بآياتنا يؤمنون .» (الاعراف - ١٥٦)

شو آيت كريمه ده الله رب العالمين حضرتلري استرسه
 عذاب ايد چگندن خبر ويرمش . بوندن صوكت «و رحمتي
 وسعت كل شيء» جمله مبارك سيله همه انسانلرك بلكه
 همه شيداركت كيكت رحمتلرده خلودلريني بيان ايتمشدر .
 عذابي مشيئت ايله تقييد ايدوب ده ، رحمتي مطلق ذكر
 ايتمك . «شيء» كبي اكت اعم بر تعبير اوزرينه «كل»
 كبي اكت احاطه لي بر حرف استغراق زياده ايتمك . ابديت
 طرفنده هر بر انسانكت ضروري صورته ده رحمت الهيه
 مطلقه ده بقاسنه البته غايت واضع طرزده دلالت ايدر .

شو آيت كريمه ده هيچ بر انسان «ابديت طرفنده
 رحمت الهيه ده مؤبد صورته بقا» دن استثنا اولنما مشدر .
 لكن بزم كلاميون بر م روسيا اماملري «فساكتها للذين
 يتقون و يؤتون الزكاة و الذين هم بآياتنا يؤمنون» جمله
 معجزه سنه تمسك ايدوب ، رحمت الهيه يي ، ابديت طرفند
 نجاتي ، يالكتز مؤمنلر . حصر ايتمك طارلقنه ذاهب اولمشلار .
 شو آيت كريمه ده «فساكتها» جمله معجزه سيله حصر
 دعوى ايتمك مسئله سنده اهل كلام غايت جلي صورته بر
 قاچ علمي خطاليه يا عمدأ يا جهلا دوشديلر . منطق ياخود

اصول فقه قواعدینه بر قدر آشنا اولان هر بر انسان
او خطالری جزئی بر ملاحظه ایله بیلور:

(۱) اولگی خطالری: عمومک حکمنه موافق دیگر بر
حکمله عمومی تخصیص ایتمک مسئله سیدر. منطق همده اصول
کتاب آرینک بیانلرینه کوره، بر حکمی دیگر بر حکمله
تخصیص ایتمک ایچون حکملر آراسنده تنافی لازمدر. خاصک
حکمی عمومک حکمنه موافق اولور ایسه، او وقت عمومک
حکمی تخصیص اولنماز، «الانسان یمشی» حکمیه «الحيوان
یمشی» حکمی هیچ بر وقت تخصیص اولنه ماز. «الحر بالحر»
جمله جلیله سیله «ان النفس بالنفس» جمله عمومیه سند
عمومیت اصلا باطل اولاماز.

«ورحمتی وسعت کل شیء» جمله عمومیه سیله «فسا-
کتبها للذین یتقون» جمله خصوصیه سی بری دیگرینه موافق
ایکی حکملردر. اولگی سند وار عمومیتی ایکنچی سند وار
خصوصیتله تخصیص ایتمک لغتدن ده علومک قاعده لرنندن ده
غفلت ایتمک دیمکدر. بویله خطالر اهل کلامک اوزلرینه
عائده مسئله لرده مقبول اولا بیلور ایسه ده عالم انسانیتک
عمومنه، همده ارحم الراحمین الله رب العالمین حضرتلرینک
تخجیری قابل دگل رحمت الهیه غیر محدودده سنه عائد مسئله
لرده اصلا مقبول اولاماز.

خطابده شدتمزی اهل کلام بزه شاید عفو ایدرلر.
زیرا «همه عالم انسانیتی مؤبد صورتده اونلرده یاقهقی»

کبی قساوتلره بزم طرفدن کوسترلمش شو شدت اضطرار
حکمیله اختیار سز چیمش بر حرکتدر، اضطرار حکمیله وجوده
کلمش حرکتلری شریعت اسلامیه عفو ایدر.

۲. ایکنچی خطالری: «مقیدلره رحمت ایتمک» ایله
«رحمتی تقید ایتمک» کبی بری برینه تماماً باشقه شیلری
فرق ایتمه مکلر ایدر.

«فسا کتباً للذین یتقون» جمله الهیه سی مقیدلره یعنی
مؤمنلره و جوباً رحمت ایتمگی قطعی صورتده افاده ایدر
ایسه ده، رحمت الهیه تقیدینه اصلاً دلالت ایتمه یور. اتقا
ایدنلره، زکات و یرنلره، مؤمنلره و جوباً خدای رحمت ایدر، بوراده
شبهه یوق. لکن «ورحمتی وسعت کل شیء» کبی اختصاصی
قابل دگل بر نص محکم وار ایکن، «دیگرلره رحمت ایتمز»
سوزی نره دن چیقدی؟

نیچون بزم اهل کلام بویله واضح شیلری آکلامایور؟
بن شو «نیچون» ی ادبیات عربیه مده بر قدر بیان
ایتمش ایدم.

دعوا مزه برنچی برهان اولمق اوزره بر ششو آیت
کریمه بی ذکر ایتدک. زیرا اهل کلام ابدیت طرفنده
رحمت الهیه ناک یا لکز کندولرینه انحصارینی اثبات مقامند
شو آیت کریمه یه تمسک ایدرلر. بزم بیاندن اهل کلامک
استدلاللارنده خطالری، شو معجز آیتک بزم دعوا مزه صرا-
حتله دلالتی آجیق صورتده کورندی.

شمدى شو معجز آيتك افاده بليغہ سندن استفادہ ايتمك
ايچون، شو معجز آيتك خطاب الھيسنه سمع استفادہ يى
ويره يك :

« و رحمتى وسعت كل شىء » جملہ عموميه سى — عمل
مقابلہ دگل يالکيز امتنان طريقيه همه انسانلره مبذول اولان
رحمت الھيه مطلقہ عموميتنه دلالت ايدر. الله حضرتلر يئك
رحمتلر يئك اكرى شو نوعدنلر: انسانلره بئل اولنمش
وجود، عافيت، اھتدا، طاعت، نبوت، عقل كى نعمتلر ك
ھر برى يالکيز رحمت امتنان فيضيله انسانلره ويرلمشدر.
شو رحمت امتنان انسانلر ك هيچ برينه، زمانلر ك ده هيچ
برينه مخصوص دگلدر. دنيا ده هر دقيقه ده همه انسانلره
حسابلر صورتده شو رحمتك مبذوليتى كى، البته،
آخرت ده ده شو رحمت امتنان هر بر انسانه بلا استثنا بئل
اولنہ چقدر. « عذابى اصيب به من اشاء » دلالتيله مشيئت
الھيه تعلقى تقديرندہ بر قدر مدت بعض انسانلره عذاب
واقع اولا بيله چك ايسه ده « و رحمتى وسعت كل شىء »
دلالتيله عاقبت هر بر انسانك رحمت الھيه ده خلودى قطعى
صورتده ثابتدر.

« فساكتبها للذين يتقون ويؤتون الزكاة و الذين هم
بآياتنا يؤمنون » جملہ خصوصيه سى — عمل، يعنى انقا، زكات،
ايمان مقابلندہ فضل هم احسان طريقيه يالکيز مؤمنلره
رحمت الھيه خصوصيه نك مكتوبيتنه دلالت ايدر. خصوصى

رحمتك مكتوبيتى الانعام سورہ سندہ (۵۴) «واذا جاءك الذين يؤمنون بآياتنا فقل سلام عليكم . كتب ربكم على نفسه الرحمة انه من عمل منكم سوء بجهالة ثم تاب من بعده واصلح فانه غفور رحيم» آيت كريمه سندن ده مستفاد در .

شو برى برينه من حيث الحكم موافق ايكي معجز
جمله لارك - برى «و رحمتى وسعت كل شىء» جمله كريمه
سى ، ديگرى «فسا كتبها للذين يتقون» جمله كريمه سى
افاده سيله ايكي نوع رحمت ثابت اولور: برى عمل مقابلنه
دگل يالگزارحم الراحمين الله رب العالمين حضرتلارينك
امتنانيله همه انسانلره بلا استثنا هم دنيا ده هم آخرت ده بلا
حساب بنل اولنور رحمت عموميه در . ديگرى اتقا ، زكات ،
ايمان كى عمل مقابلنه اجر اولمق صفتيله شارع كريم الله
حضرتلارى طرفندن وعد اولنمش رحمت مكتوبه در . انسان
نلر رحمت عموميه به بلا استحقاق نائل اولورلار؛ رحمت
خصوصيه بى ايسه ، هر بر انسان يالگزارجتهدايله ، حيات
انسانيه نك مصلحتلرينه عائد خير اشلرى اداسيله اعرار
ايدر . الله رحمت عموميه سيله همه عالم وجودى ايجاد ايدوب ،
همه عالم وجودى تربيه ايدر؛ رحمت مكتوبه سيله همه
انسانلرى درجات عاليه به و صول ايچون خيرات يولنده
مسابقه به دعوت ايدر .

الله محدود دگل رحمت ديگزلرينى اظهار هم ابقا ايتك
ايچون رحمت عموميه بى بلا تحديد همه انسانلره مؤبد صورتده

بذل ایتمهشد. عالم حیات ده انسانلری تنبل معطل برافه‌ماق، هم ده انسانلری مفاسد یولندن منع ایدوب صلاح یولنه دعوت ایتمک ایچون، خصوصی رحمتلرینی بالکیز عامللره، مصالح حیات یولنده سعی ایدنلره، انسانلره ضرر و یرمکدن صافلانووب اوزینک کمالاتنه وصول یولنده حرکت ایده‌نلره تخصیص ایتمهشد.

بن شمدی الله رب العالمین حضرتلرینک محدود دگل رحمت عمومیه لرینی بیانم مناسبتیه بزم روسیه مسلمانلرینک کوکله‌رنده رسوخ بولمیش هم ده یاطارلق یا مغروریت اساسنه مبنی اولمیش اسکی بر اعتقادک و اهیله‌گینی کوسترمگی موافق هم وقتلی کوردم:

اهل اسلامک اکثری «بسم الله الرحمن الرحیم» آیت مبارکه کریمه‌سنه معنی ویرور ایکن «دنیا ده همه انسانلره، آخرت ده بالکیز مومنلره رحمت ایدر الله اسمیله» دیرلر. شو اعتقاد - غایت کیفی، اک واهی، اساسی اک ضعیف بر تفسیر اوزرینه بنا فیلمهشد: گویا «الرحمن» بنیه‌سی «الرحیم» بنیه‌سندن ابلغ ایمش ده؛ ابلغیت ده دنیا ده رحمتک عمومیتی، آخرت ده رحمتک مخصوصیتی ایل‌گنه اولور ایمش. شو تفسیرک اساسی بزم نظرده غایت واهیدر. زیرا من حیث الوضع ابلغیت تسلیم اولنور ایسه، او وقت الرحمن هم دنیا ده هم آخرت ده همه انسانلره، الرحمن بالکیز دنیا ده کذلک همه انسانلره رحمت ایدر الله اسمیله دیمک ده.

مناسب اولور ایدی. بونک اوزرینه رحمن رحیم کی
مبالغه صیغەلرینی تفسیر ایدر ایکن، ابدیت طرفندە اکثر
انسانلرک هؤبد صورتندە رحمتدن محروم اولاققلرینی سو-
یلمەك، اللهک رحمتندە مبالغەبی بیان ایتەك دگل، بلكە
رحمتك اك بيوك قصورینی کوستەرك اولور.

بزدە ابلغیت مسئلەسندە رأی مشورە موافقت ایدرز.
رحمن بنیەسی رحیم بنیەسندن ابلقدر. لکن «الرحمن» ک
معناسی رحمت عمومیه سیلە همە انسانلرە دائماً رحمت ایدر
اللهدر؛ «الرحیم» رحمت خصوصیه سیلە یالکیز عامللرە رحمت
ایدر معناسندە در.

بزم شو تفسیرمز رحمت الهیه دە مبالغه وجودینی تمامیلە
اثبات ایدر. قرآن کریمک بعض آیتلری دە بزم نفسیرمزی
تأیید ایدر: قرآن کریم دە احوال قیامت بیان اولنور ایکن،
الله رب العالمین حضرتلری آیتلرک اکثرندە «الرحمن»
اسمیلە تسمیه اولنمشدر. بونکله «الرحمن» ک دنیا یە عدم
احتصاصی شبەسز صورتندە ثابت اولور.

قرآن کریم دە رحمتک عمومیتی، همە اشیایی بلا استثنا
احاطەسی بیان اولنور ایکن، «الرحمن علی العرش
استوی» آیت کریمەسندە «الرحمن» ک مذکوریتی دە بزم
نفسیرمزی تقویه ایدر. زیرا عرشک حقیقتی مفسرلرک
هیچ برینه معلوم دگل ایسە دە، هم دنیا دە هم آخرتندە بقاسی
همەمزە معلومدر.

همه موجوداتدن بیوک اولوب، ابدی فالاقق عرش اعظمی اللہک رحمت عمومیه سی احاطه ایتمش ایسه، آخرتده رحمت الهیه عمومیتی، بلا استثنای همه انسانلره مبدولیتی «الرحمن علی العرش استوی» آیت کریمه سیل قطعی طرزده بلا شبهه ثابت اولور.

بنم «الرحمن علی العرش استوی» آیت کریمه سنه عائد بیانده، گمان ایدرم، تاویل فلان یوفر. اویله ایسه شو آیت کریمه یی بن «رحمت الهیه عمومیتی» مسئلسنه ایکنچی برهانم کبی کوستره بیلورم. گمان ایدرم بنم شو حق ی هر بر منصف قبول ایدر. زیرا لغتک دلالته الک قریب بر تفسیردر.

اگرده شوسوزم ثابت اولور ایسه، بوراده استطرادی صورتده ذکر اولنه بیلر چک دها بر فائده علمیه حاصل اولور: «الرحمن علی العرش استوی» آیت کریمه سی متشابه اولمقدن چیقوب، معناسی غایت واضح محکم بر آیت اولور. شو فائده، قیمتی تقدیر قیلنه بلور ایسه اهل تفسیر هم اصولیون ایچون ضرر سز بر فائدهدر.

بنم گمانم چه بوکا باشقه تفسیرلر او قدر درست اولاماز. زیرا بزه «الله علی العرش استوی» جمله سیله «الرحمن علی العرش استوی» آیت کریمه سی آره سنده من حیث المعنی فرق آرامق البته لازمدر. بلاغتک اقتضای سیده شودر. نیچون «الله علی العرش استوی» دیه یوب،

«الرحمن على العرش استوى» دیمش؟ بونی ملا حظہ
ایتمک تیوش ایدی .

بزم بیانمزه کوره، آیت کریمه رحمتک عالم وجودی
احاطه سنه دلالت ایدوب، متشابه دگلدر. آیت کریمه دن
مستفاد اولان استقرار «اولئک علی هدی من ربهم» آیت
کریمه سنده گی استقرار کبی در .

بیان خدا ندارد نقاب و پرده . ولی

غبار ره بنشان با نظر توانی کرد

مطلب دن اوزاق کتمک مخدوری اولماسه ایدی،
تفسیری ایچون متعدد کتابلر تألیف قیلنمش شو آیت
کریمه حقنده بز بوراده اوز فکر مزی بر قدر عرض
ایدر ایدک .

شمدی مقصدمزه فایتبوب «رحمت الهیه عمومیتی»
مسئله سنده اوچنچی برهانمزی ذکر ایده یک :

(۳) قل یا عبادى الذین اسرفوا على انفسهم لا تقنطوا
من رحمة الله . ان الله یغفر الذنوب جمیعا . انه هو الغفور
الرحیم . «الزمر - ۵۳»

انسانلرک هر بری بلاشبهه «یا عبادى» خطابى تعتنه
داخلدر . «ان کل من فی السماوات والارض الا آتی الرحمن
عبدا» (مریم - ۹۳)

اسرافیه ده آیت کریمه مطلق ذکر ایدوب «الذین
اسرفوا» عمومندن هیچ بر مسرفی استثنای ایتمه مشدر .

صوکره قرآن کریم «ان الله يغفر الذنوب جميعا» جمله
 مؤکده سبله الله هر بر گناهی البته مغفرت ایدر دیمشدر .
 بوراده «الذنوب جميعاً» صیغه سی بیان تغییر ی یعنی استثنائی
 قابل دگل بر مفسر ، نسخی ده قابل دگل بر محکمدر . شبهه
 یوق «الذنوب جميعا» صیغه سی کبائر ی ده کفر ی ده شاملدر .
 بلکه کفر بالاویه «الذنوب جميعا» تحتنه داخلدر . لیکن
 شو قدر وارد که قرآن کریم «ان الرحمن لا يعذب احداً»
 دیمه مش ، بلکه «ان الله يغفر الذنوب جميعا» دیمش ،
 مغفرت ایسه ابکی صورتی احتمال طوتار : هیچ بر عذاب
 ایتمه یوب ، مغفرت ، یاخود بر قدر مدت عذاب صوکنده
 مغفرت .

بوکا کوره ده «ان الله يغفر الذنوب جميعا» آیت کریمه
 سی «ان الله لا يغفر ان يشرك به ويغفر ما دون ذلك لمن
 يشاء» آیت کریمه سنه هیچ بر صورتله معارضه ایتمه یور .
 زیرا «ان الله لا يغفر ان يشرك به» آیت کریمه سی
 بالکز مواخذه به دلالت ایدوب ، مؤبدلگه دلالت ایتمه یور ،
 «ان الله يغفر الذنوب جميعاً» آیت کریمه سی بر قدر عذاب
 صوکنده مغفرتک واقع اولاجفنه قطعی صورتده بلا شبهه
 دلالت ایدر .

اهل کلام شو ابکی آیت کریمه آراسنده تعارض
 واردر دیسه لرده او قدر اصابت ایتمه مشلر . بر تقدیر
 تعارض وجودی تسلیم قیلنور ایسه ده «ان الله يغفر الذنوب

جميعا» آيت كريمه سنك وعد اولمق جهتيله ، وعيد اولان
«ان الله لا يغفر ان يشرك به» آيت كريمه سنه تقدمي البته
لازمدنر. زيرا عفو ايتكم مغفرت ايتكم اللّٰك كرمته
حكمتنه عزتنه دها زياده مناسبدر.

آيت كريمه ختامنده كلمش «انه هو الغفور الرحيم»
جمله جليله سى ده بوكا دلالت همده بونى تايد ايدنر. زيرا
«لا تقنطوا من رحمة الله. ان الله يغفر الذنوب جميعا»
جمله سى صوكنده «انه هو الغفور الرحيم» ى ذكر ايتكم
تاكيدى قطعيتى، البته وقوع مغفرتى افاده ايتنر سه ، بر
دفعه رحمتى، مغفرتى ذكر صوكنده ، غفورلگى رحبيلگى
ذكر ايتكم ده بر معنا قالماز ايدى.

بونكله بزم اوچ برهاننر تمام اولدى. بونلاردن بيك
درجه دون دليللره اهل كلام بيوك مذهبلىر تاسيس ايدنر لر.
شو اوچ برهاننردن دها قوتلى بزم برهانلر مز وار ايسه ده،
بز بر مذهب تاسيس ايتكم خيالنده دگلز.

من وانكار كتاب ! اين چه حكاييت باشد ؟ !
غالباً اين قدرم عقل و كفايت باشد .
زاهدان دعوايم قبول نكند معذورست
علم كار بست كه موقوف هدايت باشد .

علمى بر مسئله ناك علميهنده يا لهنده بازار ايسه م ،
بالكز قرآن كريمك آيتلرينه ، يا خود سيدالوجود نبى اسلام
شارع اكبر عليه الصلاة والسلام حضرتلرينك احاديث

ثابتەلەرىنە استناد ايدىم . بىۈك عالملىرى ھەر كىسەن زىيادە
احترام ايدىر ايسەمدە ، مسئلە علمىيەيى بيان ايدىر ايكەن
او بىۈكلەرنىڭ سوزلەرىنە ھەلەكەتلىك صەفىيە وىرەمەم .

نېچۈن ؟

زىرا قرآن كرىم اماملارمىزنىڭ اللەدە طلبەلەرمىزنىڭ
اللەدە قالمادى . قرآن كرىمى ، احاديث نەبىيەيى احيا اىچۇن
مسائل اعتقادىيەيى يازار ايكەن ، بىز كوزمىزدە كلام
كتابلەرنىڭ ؛ مسائل فقيھەدەن بىخەتەر ايدىر ايكەن ، جامع الرموز
بىزىيە ، ابن عابدىن كىمى كىتابلەرنىڭ ، آيتلاردىن استدلال
ايدىر ايكەن ، تەفسىر كىبىرنىڭ بىز كوزمىزدە ھەلەكەتلىك
صەفىيەلە بىر پارەلەك ھەمىنلەرى يوقىدۇر .

«اولم بىكفهم انا انزلنا عليك الكتاب يتلى عليهم ، ان
فى ذلك لرحمة وذكرى لقوم يؤمنون» (العنكبوت-۱۵)

زەھىد ظەھىر پەرسەت از ھال ما آگاہ نىست

ھەرچە كۆيدىدۇ ھەقىقەت ما جاي ھېچا كراھ نىست

۳ نچی بایده قرآن کریم آیتلرندن اوچ برهان سرد
ایتمش ایدم. دیگر آیت کریمه لری سردم دن قبل، جزئی
بر مصلحت ملاحظه سیله، آراده ایکی حدیث صحیح سرد
ایتمگی مناسب کوردم.

(۴) نچی برهان: اهل حدیثک الک بیوک امامی محمد
بن اسماعیل البخاری حضرتلری امت طرفندن صحتی
بالاجماع قبول قیلنمش کتابنده، اسلامک الک بیوک خلیفه سی،
صحابه لریک الک عالمی عمر بن الخطاب رضی الله عنه حضر-
تلرندن روایت ایدر:

«قدم علی النبی سبی (من هوأزن) فاذا امرأة تعلب
تديها تبغی اذا وجدت صبیا فی السبی اخذته، فالصقته
ببطنها، وارضعته. فقال لنا النبی صلی الله علیه وعلى آله
وسلم: اترون هذه طارحة ولدها فی النار؟ قلنا: لا، وهی
تقدر علی ان لا تطرحه. فقال: لله ارحم بعباده من هذه
بولدها».

ترجمه سی: سیدالوجود علیه الصلاة والسلام حضرتلری
بو یورمش: شو آناوز بالاسینی اوت ایچینه برافورمی دیسر؟
اصحاب کرام حضرتلری دیمش لر: یوق، قدرتی وار
ایکن البته هیچ بر وقت برافماز.

همه عالم‌ره رحمت اولمق صفتيله کوندورلمش نبی
اسلام علیه الصلاة والسلام حضرتلری او وقت دیمش :
یمین ایدرم ، الله اوز بنده لرینه ، شو آناڭ اوز بالاسینه
مرحمتندن ده‌ا زیاده مرحمتلی در .

« صبح دولت می دمد ، کوجام همچون آفتاب ! »

« حقیقی زین به کجا باشد ؟! بده جام شراب ! »

محترم امام افندیلر حدیث کتابلرینه مراجعت
ایتسونلر . شو حدیث ، هم ده بوناڭ کبی دیگر حدیثلر
صحیح بخاری ده هم ده حدیث کتابلرینڭ اکثرنده وارد .
بویله حدیثلرڭ دلالتلری غایت واضعدر . حاشیه‌لرڭ
شرحلرڭ بیانلرینه هیچ بر جهندن محتاج دگلدر .

« زهی نادان‌که او خورشید تابان »

« بنور شمع جوید در بیابان . »

دعوامزڭ خلافتنه سویلنه بیله‌جک سوزلری ایشتمک
ایچون‌گنه بر حاشیه‌لره شرحلره مراجعت ایتدک . کوردک :
شرحلر « وفی الحدیث جواز النظر الی النساء المسیات »
کبی صوڭ درجه اهمیت سز استدلاللری ذکر ایدوب ،
عاقبت دلالتی یوق شیلره نمسک ایدهرک عموڭ یالکیز
مؤمنلره انحصارینی دعوی ایتمشلر . بن او دعوالرینڭ
اساس سزلمگینی ۲۴ نچی عدد « شورا » ده بر قدر کوسترمش
ایدم . بوکا کوره‌ده تکرار ایتمه‌یوب ، برهانلرڭ ۵ نچی سی
اولان حدیث شریفی ذکر ایدرم :

(۵) « يقول الله في ذلك اليوم شفعت الملائكة والنبیون
والمؤمنون . ولم یبق احد له ذرة خیر فی النار . وبقي
ارحم الراحمین » .

« وبقي ارحم الراحمین » جمله مبارک سناك معناسی
نه؟ رحمتلری الله رحمتنه نسبتله غایت جزئی ملکرك
انسانلرك شفاعتيله فلینده ذره قدر خیری وار انسانلر
عذابدن نجات بولوب ابدی سعادتلره نائل اولاجق لار
ایسه، ارحم الراحمین الله حضرتلرینك محدود دگل رحمتلریله
عذابدن نجات بولاجق انسانلر عجا کیم لار اولاجق؟
مؤمنلر ایندی جهنم ده یوق . « وبقي ارحم الراحمین »
دالیتيله نجات بولاجق انسانلری ایندی سز بیان بیورکز!
(۶) « نکاد السماوات یتفطرن من فوقهن . والملائكة
یسبحون بحمد ربهم ویستغفرون لمن فی الارض . الا ان
الله هو الغفور الرحیم . » (الشوری - ۵)

شو آیت کریمه ده ملکرك استغفارلرینه یر یوزنده
وار انسانلرك هر بری مؤمنلری مؤمن دگللری البته
داخلدر . آیتك ختامنده « الا ان الله هو الغفور الرحیم »
جمله جلیله مؤکده سیله استغفارك البته مقبولیتنه الله حضر-
تلری بشارت ویر مشدر . استغفارلری صوکنده مغفرت
ایتمیه چك اولسه ابدی ، رحمت ، مغفرت صفتلرینی ذکر
ایتمه یوب ، « الا ان الله هو الفعال لما یرید » کبی صفتلری
ذکر ایدر ایدی .

ازیمین عرش آمین میکند روح الامین

چون دعای خالق عالم ملک وملت میکندم

مذهب‌لریڭ طارلقی سسیندن شو آیت کریمه نڭ
عمومینی نحل ایتمه‌ین اهل کلام ، الله حضرتلری تعمیم
ایتهمش بر حکمی تخصیص ایتمک آرزوسیله «لن فی الارض»
کبی صیغه عمومیه‌ی ، المؤمن سوره‌سنده اینهمش «الذین
یحملون العرش ومن حوله یسبحون بحمد ربهم ویؤمنون
به ویستغفرون للذین آمنوا» آیت کریمه‌سیله تخصیص
ایتدیرمک خیالنده بولندیلار .

بویله حرکتلری کورور ایکن ، انسان اهل کلامڭ
مغروریتنه تعجب ایدر: اوز مذهب‌لرینی حمایه ایتمک
یولنده همه عالم انسانیتی فدا ایدرلر . اوزندن ماعدا همه
انسانلری مؤبد صورتده اولتله یاقار ، لیکن اوز اعتقادینی
تعدیل یا تبدیل ایتمه‌روی رضا کوسترمز . همه عالم انسان-
نیت یوز تو بن کتسون ، یالکوز اهل کلامڭ مذهبی صاغ
قالسون . اڭ بیوک مقصدلری شودر!

۳ نچی بابده یازمش ایدم : متوافق حکملرڭ بری
دیگر یله تخصیص اولنماز . عمومی دیگر بر خصوصله تخصیص
ایتمک ایچون آراده من حیث الحکم تنافی شرطدر . شو
ایکی آیت کریمه دن مستفاد حکملرڭ هر بری حکم
ایجابی‌در . منطق ، لغت ، اصول قاعده‌لرینه کوره ، بوراده
تخصیص دعوی ایتمک غفلتدن ناشی باطل بر دعوی‌در .

کلامیون خاطری ایچون گنه شو عموم ایله خصوص
 آراسنده توفیق ازومنه موافقت قیلوب طورر ایسهك ، او
 وقت غایت آسان هم ده غایت معقول دیگر بر توفیق
 طریقی وارد: دبرزكه ملكورك بر صنفی یر یوزنده وار
 انسانلرك همه سیچون، دیگر بر صنفلری یالکیز مؤمنلر
 ایچون استغفار ایدرلر بوکا «وما منا الا له مقام معلوم»
 آیت کریمه سی ده دلالت ایدر. شو طریقله توفیق ایدر
 ایسهك ، عموم ده سلامت قالور؛ عالم انسانیت ده ابدیت
 طرفنده نجات بولور؛ اهل کلامك طلایی اولان توفیق ده
 حاصل اولور. مذعب غباریله کوکلمز کرلنمه مش ایسه ،
 سویله کز، شو توفیق ده اگوزل دگلمی در؟

مؤمن سوره سنده گی آیت کریمه ده استغفار یالکیز
 مؤمنلره در دیدك . بونی اهل کلام خاطری ایچون گنه
 سویله دك . یوقسه ، بزه کوره او آیت کریمه ده استغفار
 یالکیز مؤمنلره خاص دگلدر. آیت کریمه اورتاسنده کلمش
 «ربنا وسعت کل شی رحمة وعلماً» جمله جلیله سنه امعانه
 فیکر مزی توجیه ایدر ایسهك ، بزم سوزمرك صحتی بر
 قدر آکلاشیلور . او قدری مطلبدن خارجدر، ایندی
 بدنجی برهانمزی ذکر ایده يك :

(۷) نبی محترم عیسی علیه السلام حضرتلریله والدۀ
 عنرالری مطهر مقدس مریم علیها السلام حضرتلرینی اله
 دبش نصارالر حقنده قرآن کریم ده ، مائده سوره سنك

آخرنده (۱۱۸) نچی آیت کریمه ده ، عیسی علیه السلام
 کبی الڭ بیوک نبیلر دن برینڭ لسان معصومندن حکایت
 ایدرک ، الله رب العالمین حضرتلری « ان تعذبهم فانهم
 عبادک . وان تغفر لهم فانک انت العزيز الحکیم » دیمش .
 کفر دن باشرک دن مغفرتڭ امتناعی خطاب سماویله
 دنیاده قطعی صورتده ثابت اولمش اولسه ایدی ، توراتی
 انجیلی قرآن کریمی تمام اسرارلریله احاطه ایدن ، علوم
 حکمییه ده بلا شبیه بزم کلامیون دن دها زیاده بیلن ،
 ایمانی هم ده الهی معرفتی همه اهل کلامڭ ایمانلرندن
 معرفتلرندن قیاس قبول ایتمز درجه ده بیوک اولان نبی
 اسلام عیسی علیه السلام حضرتلری شرکدن مغفرتی حکمت ،
 عزت دیمه مش اولور ایدی .

لسان معصومه سویله نوب ، قرآن معصوم طرفندن
 اقرار قیلنمش ، قیامت کبی الڭ دهشتلی بر کون ده ، همه
 عظمتیله همه قیریله تجلی ایتمش الله رب العالمین حضورنده
 سویلنمش بر سوز وار ایکن ، عفو فیلسکز ، اهل کلامڭ
 مغروریت ، طارلق اساسلرینه بنا قیلنمش سوزلرینی قبول
 ایتیمه طاقتم بوقدر . ایمانم بوندن ابا ایدیور !

اللهڭ یاقتی کونی کبی خاطر م ده در : مکه مکرمه ده
 کعبه معظمه حضورنده حنفیلر مفتی سی استاذمز الشیخ صالح
 درسنده صحیح النسائی ی اوفور ایکن « عن ابی ذر ان
 رسول الله صلی الله علیه وسلم قام حتی اصبح بآیه . والایه

ان تعذبهم فانهم عبادك . وان تغفر لهم فانك انت العزيز الحكيم . » حديث شريفينى اوقومش ايدم . همه عالمه رحمت اولمق صفتيله كوندورلمش نبى اسلام عليه الصلاة والسلام حضرتلرى نيچون شو آيت كريمه ي تون بوينده تكرار ايتمهش ؟ ملاحظه ايتدم . او ساعت بيت خدا هيبتيله آيت كريمه بلاغتى كوكلمى استيلا ايتديلر . درسمى قطع ايتدم

شو آيت كريمه تفسيرنده كلاميون طرفندن سويلنمش سوزلره نظر ايدر ايسه ، اهل كلامك حاللرينه تعجب ايدرم ، دعوام حقيتنه ايمانم زياده اولور . آيت كريمه دلالتيله منهبلرينك بطلاننه قطعى علم حاصل اولمق لازم ايكن ، بزم اهل كلام واهيلگى اوزلرينده معلوم اك بيهوده وجوه كلاميه ايله آيت كريمه ي تاويل يا تعريف ايتمكدن استنكاف ايدمه يورلر . يالكز كشاف صاحبي محمود زنجشورى حضرتلرى بر قدر انصاف كوستروب ، اوز منهبي خلافته اولارق « المفقرة حسنة لىكل مجرم فى المعقول . بل متى كان المجرم اعظم جرماً كان العفو عنه احسن » ديمش . شو سوزيله شرك دن مغفرتك جوازينه اضطراراً فائل اومشدر . كبائر ايچون عقابى ايجاب ايدن بر متكلم ، شو آيتك غايت واضح دلالتيله اعتقادينك بطلاننه اعتراف ايدوب ، گناه نه قدر بيوك اولور ايسه ، مغفرت ايتمك او قدر گوزل اولور ديمشدر . منهبلره تعصبكده البته بر

چيگي اولور. اڭ شديد تعصب لرده البته بويله واضح
بيانلره مقاومت ايده مز.

لكن شو زمانمزه اعتقادلريني كلام نيگزلرينه بنا
ايدنلر، اللرنده يوق منطق قوه سيله هر بر نرسه يي بيلورم
خيالنده اولانلار آيت كريمه لرك دلالتلريني قبول ايتمه مك
حقنده البته اصرار ايدرلر.

هر آنكس را كه ايزد راه نمود

ز استعمال منطق هيچ نكشود.

شو آيت كريمه افاده سنه دهها بر قدر قولاق ويورور
ايسه ك آڭلارز: نبي محترم عيسى عليه السلام حضرتلري
مغفرتي تعليق صورتنده ذكر ايدوب، طلب صيغه سيله «سكا
شرك ايدنلري مغفرت قيل!» ديمه مش. البته الله اڭ عظمتي
حضورنده تأدب، امري حقنده غيرت بوني اقتضا ايدر. شو
تأدب اقتضا سيله ملكلرك بعضلري مغفرتنده صريحاً ذكر
ايتمه يوب، «ربنا و سعت كل شئ رحمة و علماً» كبي بر
تعريض عباره سيله اكتفا ايتمشلردر. بوندن صوك عيسى
عليه السلام حضرتلري «فانك انت الغفور الرحيم» ديمه -
يوب «فانك انت العزيز الحكيم» ديمش. نيچون بويله؟
زيرا هر بر شئ اوزرينه غالب، اوزينه بر شئ واجب
اولا بيلمك امكانندن متعالی الله حضرتلري اڭ بيوك گنا-
هلي ده عفو ايدر ايسه، او وقت الله اڭ كرمي حكمتي دهها
زياده ظاهر اولور. بو - بر وجه. ايكنچي وجه: غفور

رحيم صفتلريني ذكر ايتسه ايدى ، عيسى عليه السلامك
سوزى شفاعت كېي پر شى اولور ايدى . شفاعت سز مغفرت
ايسه ، اللّٰهك كرمه رحمتنه دها زياده مناسبدر .

بن غافل دگلم : شو آيتك دلايل بنم دعوام كل صورتك
ثابت اولمايوب ، بلكه جزئى صورتده يعنى عيسى عليه
السلام والد مطهره مقدسه سى مريم عليها السلام حضر -
تلاينى اله اعتقاد ايدر ملتلمر حقنده غنه بنم دعوام ثابت
اولور . لكن شرك ايله شركى اهل كلامك هيچ برى فرق
ايتمه يور . بوكا كورهده دعوام او چيتمدن كل صورتده ثابت
اولور .

شو يرده سرد اولنمش دليللر مه خاتمه اولمق صفتيله
ذكر قيلنه جق ٨نچى برهانه بر مقدمه قيلمق صورتيله بر
قدر سوز سويله مگى مناسب كوردم .

بر يوزنده وار دينلردن بودديلك يهوديت نصرانيت
اسلاميت كېي زمان مكان اتباع اعتباريله عموميت كسب
اينمش دينلرك اتباعلرى ده ، كلدانيلرك آشوريلرك يونانيلرك
مصريلرك دينلرى كېي بر دولت بر ملت دائيره سندن
محصور فالمش دينلرك اتباعلرى ده ، ياخود او قدرده انتشار
كسب ايدمه ميوب زمان مكان اتباع جهتلريله دائيره سى غايت
تنگ فالمش دينلرك اتباعلرى ده ، الله حقنده اوزلار يينك
اعتقادلرينى اوزلرينه كوره البته عقل هم نظر اساسلرينه
بنا ايتمشلردر . شو دينلردن هر برينك اوزينه كوره علم

کلامی، هر علم کلامک اوزینه کوره نظری استدلالی، هر نظرکده اوزینه کوره برهانلری دلیللری واردر. حتی وعشیلرده بر مجبوریت اولمادقچه بر اعتقادی قبول ایده مز. حیوانیت درجه سندن بر قدر آشمش انسانلرک هر برنده اوزارینه کوره بر نظر اساسی اوزرینه تأسیس قیلنمش بر فکر الوهیت واردر. بر یوزینه کلوب کتمش هر بر انسانک الله حقنده اوزینه کوره بر نظر اساسنه بنا قیلنمش ایمانی واردر.

بزم اهل کلام، احتمال، بنم شو سوزمی قبول ایتمز یا ایده مز. لیکن شو مسئله حقنده بنم فکرم نظرم دها زیاده واسعدر.

بن او نظرمی، دیناره عالم انسانیته نظرلری غایت کیك اهل تصوف بیوکارینک نظرلرندن اقتباس ایدرم؛ یاخود قرآن کریمک اصول کلامیه ایله تحدید اولنهامش ارشادندن اخذ ایدرم.

الله قرآن کریم ده الانعام سوره جامعه سنک ۳۸ نچی آیت کریمه سنده «وما من دابة فی الارض ولا طائر یطیر بجنایه الا امم امثالکم. ما فرطنا فی الکتاب من شیء. ثم الی ربهم بعثرون.» دیمش.

بر قدر امعانله ملاحظه ایده یك: جانلی نوعلرک هر برینی الله رب العالمین حضرتلری بر امتدر دیمش. بونکله گنده اکتفا ایتمه یوب، مدینتک بایتاق درجه لرینه

ايرشمش انسانلره خطابا «امثالكم» بيورمش . «مثل» كڭ
معناسى بزم اهل كلامه البته معلومدر . يعنى : جانلى نوعلاركڭ
هر برى حيات ، حركت ، حس ، فكر خصوصلرنده تمام
سزكڭ كى برر امتدر .

بزده هم بزم اهل كلامده بيوك همت ، قرآن كريمكڭ
هايتلرندن بحث ايدر قدر نشاط اولسه ايدى ، شو آيتكڭ
اكڭ كيكڭ معنالرينى آكلامق آرزوسيله ، بز البته عالم
طبيعتكڭ بيوك اجراملرندن اكڭ اوافق ذهلرينه قدر
بحث ايدر ايدك .

بزده اويله همت او قدر نشاط قاىده ايندى ؟ ! اما
اوز جهانزى ، صوكڭ درجه ده قصورمى ديگرلردن ده
اوزمزدن ده ستر ايتمك مغروريتيله ، تاويل يا تعريف
ايدرك ، آيتلركڭ بلاغت الهىلرينى هدم ايتمك جسارتى
ماشاءالله ، بزده توكنمز بتمز قدر چوقدر .

بز موقت صورتكڭ گنه ايسه ده اهل كلامكڭ طار مذهبلىنه
موافقت ايدوب ، او آيتكڭ معنالرينى بتون كوچمزله تعديد
ايتميه همتى صرف ايدريك . نه قدر اجتهد ايدر ايسه
كده او آيتكڭ عمومندن ير يوزينه كلوب كتمش انسانلركڭ
بررينى استثنا قىلا بيلور قدر او آيتى تعديد ايتمك بزه
ميسر اولماز . اويله ايسه انسانلركڭ هر برى الله رب العالمين
حضرتلرينه ايمان حقنده ، سز هم بزكى نظر صاحى اولور .
نو - بر .

بوندىن صوڭ الله قرآن كريم ده ينى اسرائيل سوره-
سندە (٢٣) نچى آيت كريمه ده «وقضى ربك ان لا تعبدوا
الا اياه» ديمش. بزم اهل كلام بوراده «قضى» ي امر
معناسنده قىلوب، امرى ده شرعى يه عمل ايتمشلر. گوزل.
ليكن بى «قضا» ماده سنده قرآن كريمك عرف اغلبيله عمل
ايدىر ايسهك، بوراده «قضى» ي حكم معناسنده قيلمى
دها مناسب بولورز.

اويله ايسه، دنيا ده وار انسانلر ك هر برى يالگىز
بر الله رب العالمين - حضرتلرينه عبادت ايدىر. بو ايكنچى.
بن انشاء الله شو ايكنچى مقدمه مى تاريخ اديان بحثلرندە
دها مفصل صورتدە اثبات ايدىرم شايد.

شو ايكى مقدمه ي تمديد صوڭنده، بن ايندى اللهاك
اعانه سيله ٨ نچى برهانى ذكر ايدىم:

٨) نچى برهانم: الله رب العالمين حضرتلرى المومنون -
سوره سنك الك صوڭقى ايكى آيت كريمه لارندە «و من يدع
مع الله اليآ آخر لا برهان له به فانها حسابه عند ربه. انه
لا يفلح الكافرون. - وقل رب اغفر و ارحم و انت خير
الراحمين» ديمش.

شو ايكى آيت كريمه ده اهل كلامه ملاحظه سى
لازم چوق شيلر واردر:

قرآن كريم «برهانى يوق ليكن شك ايدىر ايسه،
حسابى يالگىز اوز ربي فاشنده اولاجقدر.» ديمش. اويله

آدمی تکفیر ایدوب، جهنمه برافمق اختیارینی قرآن کریم
 شو سوزیله اهل کلامک النذن آلمش دگلمیدر؟ برهانی
 یوق ایکن شرک ایدن انسانک حسابی یالکیز بر الله عامنه
 تسلیم اولنمشدر. او یله انسانی تکفیر ایدوب، جهنمه برافمق
 جسارتندن بزم اهل کلام سکوت ایتمش اولسه لار ایدی،
 قرآن کریم بلاغتی حضورنده دها زیاده ادب دائره سنده
 حرکت ایتمش اولورلار ایدی. بو - بو.

«برهانی یوق ایکن شرک ایدر ایسه» دینلمش. یا
 بزم اولگی مقدمه مزه کوره برهانی وار ایکن شرک ایدر
 ایسه، نه اولاق؟

اولگی مقدمه ده بیان ایتدک: هر بر انسانک اعتقادی،
 توحید اولسه ده شرک اولسه ده، اوزینه کوره بر نظر،
 اوزینه کوره بر برهان اوزرینه مبنیدر.

قرآن کریمک بلاغت اعجازیه سی اقتضاسیمله ذکر
 اولنمش «لا برهان له به» قیدینی مهمل قیلماق ایچون
 «برهانی وار ایکن شرک ایدر ایسه، لا یکنی الله نفساً
 الا وسعها آیت کریمه سنه کوره، او یله انسان الالهک فضلله
 مغفور اولور.» دیمک یا لازمدر، یا خودک مناسبدر.
 بو - ایکنچی.

«انسانک حسابی یالکیز ربی فاشنده در.» بیورلشمش.
 بوراده حسابک معناسی نه در؟ نیچون او حساب یالکیز
 الله دضرتارینه تخصیص قیلنمشدر؟ حساب قیلنه چق شیلر

يالكىز دفترده قيد فيلنمش گناهلردن عبارت اولسه ايدى ،
اللهك امريله او گناهلرى قيامت كوندنه ملكرده حساب
ايدنه بيلورلار ايدى دگلمى ؟

اش بويله ايكن ، حسابى الله حضرتلرينه تخصيص
ايتكده بر بيوك معنى بولنشق لازم اولمايورمى ؟ اويله
اولور ايسه ، ايندى فكر ايدريك : يالكىز الله حضرتلرينك
علمنه گنه تخصيص فيلنشق حساب نصل حساب اولاق ؟
البته ملكارك علمندن بوقارى اولوب ، يالكىز بر الله
حضرتلرينك اوزينه گنه معلوم بر حالك حسابى اولشق لازمدر .
لكن اودال گناهلردن شركدن عبارت اولماز . زيرا
گناهلرده شركده بزلره ده ملكرده ده معلوم اولمايور .
اويل ايسه ، حساب فيلنشق يالكىز بر حال قالور :
برهانى يوق ايكن شرك ايدن انسان نظر ايدر ايكن .
الله طرفندن ویرلش اقتدارى تماما بلا قصور بدل ايتديمى ؟
يوقمى ؟ انسانك اوزينه شو حالى بيلدرمك ايچون ، قيامت
كوننده الله رب العالمين حضورنده حساب واقع اولاققدر .
بوده - اوچنچى در .

حساب صوكننه ، انسانك الله طرفندن ویرلش اقتدارينى
نظر ايدر ايكن بلا قصور صرفى ظاهر اولور ايسه ، او
انسانك حالى نصل اولور ؟ بوگنا اولسكى آيت كريمه ده
جواب يوقدر . لكن ايكنچى آيت كريمه ده بوگنا جواب واردر .
ايكنچى آيت كريمه معناسى : « دى ربم ، اويله

انسانلاری مغفرت ایت، رحمت ایت، سن رحمت ایدرلر اڭ
اڭ بیوگی سن، اوپله انسانلرده سنڭ طرفڭدن ویرلمش
اقتدارى تجاوز ایدهمدیلر، وار قدر قدرتلرینی ده بلا
قصور صرف ایتدیلر».

اوزینه کوره بر برهانه تمسك ایدوب، شرك بلیه سنه
دوچار اولمش مسکین انسانلر حقنده ده، وار قدر اقتدارینی
صرف صوکنده بلا برهان شرك ایتمک ضلالنه سلوک ایتمش
عاجزلر حقنده ده، سید الوجود نبی رحمت حضرتلرینه خطاباً
الله رب العالمین حضرتلری «وقل رب اغفر وارحم» دیمش
ایسه البته سید الانبیا حبیب رب العالمین حضرتلرینڭ
دعالرینی طلب قیلماق شرطیله دیمشدر. یوقسه امر ایتمک
اللهڭ حکمتنه نظراً عبث اولور ایدی.

حجتی به زین کجا باشد ؟ ! بخوان روی کتاب !

سجن دانی، وجوش خوانی، نمی ورزند در شیراز
بیا حافظ که تا خود را بملك دیگر اندازیم.

بار ها گفته ام و بار دگر میگویم :
« گوهری دارم و صاحب نظری می جویم »

الله رب العالمین حضرتلرینه شکر ایدرم ، مسئله
بر قدر ینگللمشدی : ایلک ده غایت غریب هم ده قرآن
کریهك مقدس تعلیملرینه قطعاً مخالف صورتده تلقی
اولنمش بر مهم مسئله شو کون ، تألیف فیلمنش «رحمت
الهیة مسئلهسی» رسالہسی تأثیریه اولسه کرک ، مقبول
اولا بیلور بر درجهیه کلدی ، عذابك ابدی دگللگی ،
جهنمك ده بر کون فانی اولاجفی سلف صالحك هم ده اصحاب
کرامدن بعضلرینك فکری ایمش، - بزم روسیا مسلمانلر-
ینه ده آکلاشیلدی . هر بر حقیقتی یالکز اولرینك گنه
ماسشتابلریله وزن ایتمك جسارتنه مالک ، دائره لری طار
آدملر او رساله تأثیریه احتمال بر قدر اعتدال کسب
ایدرلر . طارلق ، مغروریت اساسلرینه بنا فیلمنش کتب
کلامیه قارا کلق لارندن نجات بولا بیلمك ایچون بزم امام
افندیلر ، احتمال ، سلف صالحك غایت واسع افکار علمیہ-

لرنڧن بھڻ اېتمك يولنھ سلوك اېدر قدر بر بېوك نشاط
ال ده اېدرلر. علوم طبيعېھي ابطال، ھم ده حكيم مطلق
الله حضرتلرېنك حكمتلرېنى انكار اېتمك نېگزلرى اوزرېنھ
تأسېس اولنمىش كلام اعتقادلرنڧن باش قورتارمق اېچون،
اسلامېنك عقللرھ اك موافق تعلېملرېنى اك اصل اك معتمد
منبعلرنڧن آلمق فېكرى، احتمال، بزم اھل اسلامك
كوكلملرنڧنھ اوبانور.

شو سوزم رحمت الھېھ عمومېتنھ نصوص اسلامېھ
نقطھسندن فارامق اعتبارېلھ در.

اما اگر قاهر مطلق الله رب العالمېن حضرتلرېنھ
اك بېوك بر اسمېلھ ثنا سويلھ مك مقامېدن، ياخود غفلتى
مغرورېتى براقوب نھايتى يوق عالم وجودھ لا اقل بر پارھ-
لك اھمېت وېرمك لزومى جھتندن، يا اېسھ، عالم انسانېتك
حېات استقباليھسېنى اساسلى مركزدھ اك مكمل بر دورېېن
اېلھ رصد اېتمك نقطھسندن - رحمت الھېھ عمومېتى مسئلھ
سنھ نظر اېدر اېسھك، اووقت حقيقت اك نورلى يوزېنى
بزھ عرض ايدھك.

اويلھ واسع بر نظرى اسلامېتك مقدس تعلېملرنڧنھ
كورمك بزھ بتمز توكنمز مھنونېتى اېجاب اېدر. اسلامېتك
علوېتنھ قدسېتنھ دھا بر برھان اولمق صفتېلھ بز اويلھ
نظزلرى بېوك امنېتلھ قبول اېدرز. اويلھ نظزلرى قبول
اېتمك يولنڧنھ بر قدر نصوصى تاويل اېتمك ضرورتى لازم

اولوب كله چك اولسه ده ایدی، بز التزام ایدر ایدك .
 لیکن او نظری قبول ایتمك یولنده نصوص شرعیه بی تأویل
 ایتمك بلیه لرینی بز کورمه دك . بلكه قرآن كریمك
 متعدد آیتلرنده، نبی اسلامك اك جامع سوزلرنده گوزل
 صورتده بیان فیلمش بر تعلیم اولمق صفتیله بز او نظری
 قبول ایتمش ایدك .

رحمت الهیه عومیتی مسئله سنه شو چهلردن نظر
 ایدوب، بكا بر قدر روح ویرمك ایچون، ادیب محترم
 فاتح افندی امیرخان جنابلرینك قلمیله « ایدل » ستونلرنه،
 محترم H. Ю. افندی جنابلرینك قلمیله یانوار ۸ ده
 چپقمش « ترجمان » علاوه سنده نشر اولنمش مقاللار بنی
 ممنون ایدی. بكا تنزلا روح ویردکلری ایچون شو
 محترم رفیقلمه شکرلرمی تقدیم ایدرم . بیوک تربیه کورمش
 باشلرمزك فکرده بكا موافقتلریله بن علنی صورتده افتخار
 ایده بیلورم . گمان ایدرم باشلرمزك همه سی اولماسه ده،
 البته اکثری شویله در .

شو مسئله نك روسيا مسلمانلرینك مطبوعاتنده ظهوری،
 انشاء الله، فائده دن خالی اولماسه كرك . امیدم اولده
 شویله ایدی . صوگره دهها زیاده قوتلندی . مطبوعات
 صحیفه لرنده دعوامی اثبات ایتمك یولنن دوام این چك اولدم .
 رحمت الهیه عومیتی، ابدیت طرفنده، همه عالم
 انسانیتك نجاتی، عذاب اداره الهیه ایله واقع اولاقچ

ایسه بر کون البته انقطاعی - شو ایچ بیوک مسئلہ لارک
 هر بری علم کلام عالمنده غریب، یگی کبی کورنسه لرده،
 اسلامیت عالمنده یگی دگل، بلکه اصحاب کرام حضر-
 تارندن همده اسملری محترم الک بیوک مجتهدلردن تابعیلردن
 نقل اولنمش اساسلی بر اعتقاد در.

شو سوزمه برر شاهد کوسترمک قصیدله شو دفعه
 محمد بن جریر الطبری - حضرتلرینک جامع البیان اسملی
 الک بیوک، الک معتبر تفسیرلردن بوراده بر قاچ سطر
 نقل ایدیم.

مصر القاهرة ده طبع اولنمش جامع البیانک ۱۲ نچی
 جزئنده (۶۶) نچی صحیفه دن بافکڑ ابن جریر الطبری
 حضرتلری نه دیمش:

« حدثنا ابن حمید قال حدثنا جریر عن بیان عن
 الشعبي قال: جئتم اسرع الدارين عمرانا واسرعهما خرابا. »
 یعنی: « ایکی یورتک الک تیز معهور اولاچفی همده
 الک تیز خراب اولاچفی جهنمدر. »

شو سوز تاویلی قابلمیدر؟ بزم دعوامزدن بش اون
 دفعه دها زیاده واسع دگلمیدر؟ نجات عمومی اعتقادی
 قرآن کریمک تعالیم عالیه سنه قطعی صورتده مخالف ایسه،
 عجبا شعبی کبی بر مجتهدک شو اعتقادی قرآن کریمله نصل
 توفیق قیلنه بیلور؟

امام شعبی کیم در؟

امام شعبی حضرتلری سعید بن المسیب حضرتلری
 کبی الڭ بیوک تابعیلردن، علمیلله عالم اسلامیت ده الڭ
 برنچیلک درجه سنه واصل اولمش مجتهداردن، زماننده امور
 سیاسیه ده زاینه مراجعت قیلنور بیوکلردن اولوب، دورت
 مذهبی تأسیس ایدن مجتهدلرک همه سندن بلا خلاف فائق
 بر امامدر.

مسائل اعتقادییه ده اشعریلرک ماتریدیلرک سوزلری
 حجت اولاییلور ایسه، بز امام شعبی کبی بر آدمک
 سوزینی حجه ایده بیلورز. یوق، حجت اولاییلور ایسه،
 بزم ده اعتقادمز شویله در، بز همان امام شعبی حضرتلری
 طرفنه میل ایدرز. زیرا اشعریلر ماتریدیلر بزه جدلیات
 اساسنه تأسیس قیلنمش «عام» کلامی تعلیم ایده چکلر؛
 اما امام شعبی حضرتلری بزه قرآن کریمک آیتلرینی، نبی
 اسلام شارع اکبر علیه الصلاة والسلام حضرتلرینک صحیح
 سنتلرینی تعلیم ایده چک!

وحسن اولئک رفیقا. بز بونلاری ده زاده ممنونیتله
 اختیار ایدرز!

جامع البیانک عین شو ۱۲ نچی جزئنده (۶۶) نچی
 صحیفه ده ابن جریر الطبری حضرتلری، کورگز، دهانه
 نقل ایتمش:

«قال ابن مسعود: لیاأتین علی جهنم زمان تخفق
 ابوابها لیس فیها احد».

يعنى صحابه لرك عالمى عبدالله بن مسعود حضرتلرى
دېش : « يمين قيلنه چق شيلرله قسم ايدرم . پر كون
كلور ، چينم ده بر آدم قالماز ! »

بز يالكز شو سوزى برهان ايدوب ده ، دعوامزى
كوكاره قدر چيقارور ايسهك ، اهل علم حمزى البته انكار
ايدم . زيرا عالم اسلاميت ده قرآن كريمى عبدالله بن
مسعود حضرتلرى ده آكلاماش ايسه ، سفسطه لار ايله
عقللارى بوزولمش اهل كلامى آكلاياچق ؟ آكلاماش
ايسه ، اشته شو چتله عبدالله بن مسعود حضرتلرينك
سوزى بنم برهانلرمدن برى اولاييلور .

قرآن كريمى حفظى لك قوى ، اداسى لك گوزل لك
صحيح اولان صحابي ، سيد الوجود حضرتلرينك نصيله ، عبدالله
بن مسعود دگلميدر ؟ قرآن كريمى اوز ايله يازمش ،
اجتيادى فتواسى صحابه لرك هر برينه غالب اولايكلش
صحابى ده عبدالله بن مسعود حضرتلرى در !

كلاميون بر قدر انصاف ايدرمى ؟ بنم دعوام قرآن
كريمك آيتلرينه مخالف ايسه ، اودعوام سبيل بن اسلام-
ميت دائره سندن چيجه چق اولور ايسه م ، عبدالله بن مسعود
حضرتلرى قورى دعواسيله دگل بلكه يمينيله نه اولايچق ؟
ابن مسعود حضرتلرينك سوزى دعوى دگل يمين در !
دعواسنده انسان تردد ايدم بيلور . ليكن اختيارى عقلى
وار انسان شك ، تردد صورتنده هيچ بروقت يمين ايتمز .

ابن مسعود حضرتلری کبی بُر آدمدن یمین - البته قطعاً
اعتقادی وار صورتده گنه صادر اولور .

بن اگلاماق سببیله دعوی ایتمش اولایم ، احتمال
شرع شریف بنم اولیله خطامی عفو ایدر . بنم کبیلرک
مخالفتی ده قرآن کریمک حقیقته بر پاره لك ضرر ویرمز .
لکن ابن مسعود حضرتلری کبی اگ عالم بر صحابی ده
اگلاماق احتمالی البته اولماز . اولیله ذاتک بالکمز
دعواسی گنه دگل بلکه یمینی قرآن کریمه مخالف اولور
ایسه ، یا بونلک معناسی نه در ؟ ابن مسعود حضرتلری می
قرآن کریمی تکذیب ایتمش ؟ یا خود قرآن کریم می ؟
بوتون دینلرینی ایمانلرینی ملا جلال ، تفقازانی کبی
کلام کتابلرینه تأسیس ایتمش کلامیون شو ایکی شق دن
اولگی شقی می یا ایکنچی شقی می اختیار ایده چک لر ؟
نجات عمومیه بی قرآن کریمه قطعی صورتده مخالفدر دیمش
اهل کلام شبهه یوق شو ایکی احتمالدن برینی بالضروره
اختیار ایدر لر .

«یوق ! ابن مسعود اولیله سوزی سویله مز ، یالاندر !»
دیه چک اولسه لار ، حدیث امانلری قاشنک عدالتلری معلوم
راویلری تکذیب ایتمک پراواارینی اوزلرینه ویرسه لر ،
بزه آنلارک خاطرلری ایچون گنه سوزلرینه موافقت ایدرز -
ده ، کتب کلامیه بی ، اوراده وار اعتقادلری سوزلری
سجوروب طاشلارز . تاریخ شورلکلرنک خرافات شعبه سنک ،

صوڭ كله چك عصرلار ايچون محفوظ قالور .
 شو دفعه شو قدرله اکتفا ايدوب طوررز . عذاب
 آيتلاري حقنده فکرمزي بيان ايدر ايکن ، بز او وقت
 انشاء الله اصحاب کرامك هم ده تابعيلرک سوزلريني اعتقاد-
 لريني برربرر سرد ايدرز . شو دفعه ابن مسعود حضر-
 تاريله عامر الشعبي حضرتلرينك برر سوزلريني نقل ايتيمه
 عجل ايتمش ايسهك ، اوز حاللريني اعترافي ايتمك فضيله
 سندن محروم قالمش اهل کلامي انصاف حدودينه دعوت
 ايتمك داعيه سيله اولدى . کورسونلار : قرآن کريمي «احتمال»
 بزم «علمای کلام» دن «بر قدر» زياده فهم ايدر ابن
 مسعود حضرتلاريله عامر الشعبي حضرتلرينك سوزلري
 اعتقادلري نه در ؟

بن ، انشاء الله ، هيچ اولمازسه روسيا مسلمانلري
 طلبه لرينك قلوبلريني دماغلريني اهل کلامك جدلياتندن
 پا کله مک بولنده سعي ايدرم . اما اعظم ، امام مالک ، امام
 ابو يوسف کبي مذهب رئيسلري علم کلامي نيچون او قدر
 ذم ايدر اولمشلر ، انشاء الله بيان ايدرم . مدرسه شاگرد-
 لرينك اعتقادلرينه بر قدر استقامت ويره بيلور ايسه م ،
 اشته او وقت بنم غرضم حاصل اولمش کبي اولور .
 بز ملتک وجودينه استيلا ايتمش ، ملتزمي عطالت
 ياتاغنده نشاط سز بر حال ده براقمش مرضلري تشخيص
 ايدمه چك اولور ايسهك ، کوررز ؛ وجودمزده کثرتله بولنور

مرضلرڭ اڭ بېوگى قىلبلرمزى باصمىش طارلىق فارا كلىق در،
دماغلرمزى اوھام اوياسى ايتىمىش علم كلام اعتقادلريدىر.
«كلا. بل ران على قلوبھم ما كانوا يكسبون.»

او مرضلرڭ چارەلرېنى كورمىك اميدىلە، بن كىتب
كلامبەدە وار اعتقادلردن ھەر بىرىنى بىر نوبىت بولوب،
قامىك سېلىكمىك فكرىنە بش اون سنە مقدم كلىمىش ايدىم.
اھل تصوف لسانىدە «علوم رسمىيە» نامىلە، مجتھىدلرڭ
لسانىدە علم كلام نامىلە ذم قىلىنە كلىمىش بىر علم مسئلەلرڭ
فېمىتلرېنى كوستىرمىك املى بن دە قوتلىندى. بوڭا كورە شو
كونە قدر دورت بش مسئلەلې ميدانە آتدىم. بوندىن صوڭ دەھا.

بىر عزم كەلۋاتى فەلى بىز! چە دانى:

شايدىكە كۈى فرصت در اين ميان توان زد

بوندىن مقدم، محترم «شورا» صحىفەلەرنە عذاب
آيتلرېلە رحمت آيتلرى حقندە بىر قدر يازمىش ايدىم.
بوندىن صوڭ دە عرض قىلىنەچق آيت كرىمەلر حقندە على
الاجمال بىر فېكر وىرمىك قىدىلە، ھەم دە قرآن كرىم دە
او آيتلرى اوفور ايكىن اكثرياً او آيتلرى خطا آڭلار
انسانلرى خطالرىنە تنبىھ ايتىمىك اميدىلە. «الموافقات»
كېى اصول كىتابلەرنە ترغيب ترھىب آيتلرى حقندە سىرد
قىلىنمىش بىر بىئە تىرجەمىلە دگل بلىكە يالڭىز معناسىلە
بورادە نقل ايتىمىكى مناسب كېى كوردىم.

«الموافقات» صاحىبى شوو كىتابىڭ ۳ نچى جىزىندە

« ادله شرعیه » قسمند دیمش :

« قرآن کریم ده ترهیب آیتلریک هر برینه مقارن ،
یا مقدم یا صوڭ ، ترهیب آیتلری ذکر اولنور . لکن هیچ
بر آیت ده حکم اعیان اعتباریله دگل ، بلکه اوصاف
اعتباریله در . »

مثلا عصر سوره سند . الله رب العالمین حضرتلری
دیمش : « عصر شریفیله قسم ایدرم ، انسان خسارده در ،
مگر ایمان ایدوب اعمال صالحه یی ادا ایدنلر . »
بوراده « انسان » دن یاوروپا خلقی ، استثنان ده
روسیا تاتارلاری مراد دگلدر .

قرآن کریم ده نسا سوره سند (۱۴۱) آیت کریمه ده
الله حضرتلری دیمش :

« ولن يجعل الله الکافرين علی المؤمنین سبیلا »
بوراده اولگیلردن سافسونیه انگلیزلری ، ایکنچیلردن
ده هندوستان مسلمانلری یاخود مصر فلاحلری اراده قیلنه-
ماز . واقع بونڭ خلافتده دگله ی ؟
ملائکه سوره سند (۲۹) نچی آیت کریمه ده قرآن
کریم دیمش :

« انما یخشى الله من عباده العلماء »
یعنی « الله دن بالکنز عالم بنه لری گنه خوف ایدر » .
بوراده علمادن استانبول خواجه لری ، ازهر شیخلری ،
هندوستان مولویلری ، بخارا داملالری ، بزم روسیا

مدرس‌لری ، تاتار ملالری مراد دگلدر .

انبیا سوره سنده (۱۰۵) نچی آیت کریمه ده قرآن کریم دیمش :

« ولقد كتبنا فی الزبور من بعد الذکر ان الارض یرثها عبادى الصالحون » .

یعنی : « ذکر سوکنده زبورده یازدق : شو یره بنم صالح بنده لرم وارث اولاقدر . »

بوراده « صالحون » دن مصرک رفاعیلری ، مغرب سنوسیلری ، استانبول قلندرلری ، هندوستان فقیرلری ، تاتار صوفیلری ، اومت ایشانلری ، بخارا نقشبندیلری اراده اولنماشدر .

الله رب العالمین حضرتلری قرآن کریم ده « وکان حقاً علینا نصر المومنین » دیمشدر .

بوراده « مومنلر » دن کیملری اراده ایتمشدر ؟
دورت بش انگیلیر النده اسیر فالهش آلتمش ملیون قدر هندوستان مسلمانلرینی می ؟ غاللانیه پنجه سنده قلفی ایدر جاوا مسلمانلرینی می ؟ یاخود . .

قرآن کریم حساب سز آیتلرده ایمانی مدح ایتمش ایسه ، بدء المعارف ایله ملا جلال ده یارلمش مسئله لری اراده ایتمه مشدر .

قرآن کریم « صالحات » ، « خیرات » عبارت لریله افسانلری گوزل اشلره دعوت ایتمش ایکن ، صالحان دن —

قازان تلنده تسبیح طارتمق، یوز بیك مرتبه هر کون
صلوات اوفومق، قصیده برده لری تعبد قصیده تکرار ایتمک
کبی اشلری اراده ایتمه مشدر.

الله رب العالمین حضرتلری قرآن کریم ده هر بر
سعادتلی متقیلره وعد ایتمهش ایسه، متقیلردن باشیل چاپان
صاری چیتوگ بورکه نور صوفیلری، مرید تربیه ایدر
شیخلری، تکیه لرده عمر ایدر ابدالمری، دنیادن غافل
زاهدلری، نا محرم یوزینه باقاماز ایزگولری ده اراده
ایتمه مشدر.

الله رب العالمین حضرتلری قرآن کریم ده «کنتم خیر
امة اخرجت للناس تأمرون بالمعروف وتنهون عن المنکر»
دیمش ایسه، تنبیه الغافلین دن درة الواعظین دن تذکرة
القرطبی دن وعظ سویلر اماملری خواجه لری، مصرده طبع
اولدش خطبه لردن برینی منبرلرده اوفور خطیبیلری ده اراده
ایتمه مشدر.

الله رب العالمین حضرتلری «ومن لم یحکم بما انزل
الله فاولئک» دیمش ایسه، «ما انزل» دن بزازیه لرده، تنو
برلرده، جامع الرموزلرده یازلمش حکملری ده قصد قیلما مشدر.
الله قرآن کریم ده جنت اهللرینی ده جهنم اهللرینی ده
بیان ایتمه مشدر، لکن، یعنی «آنا طول تورکلری» - یعنی
«آمریقا انگلیزلری» دیمه مشدر.

قرآن کریم ده عذاب آیتلرینی یاخود رحمت آیتلرینی

اوقوب استدلال ایدە چك آدملره شو نقطه يي ملاحظه ایتەك
 ضروردر. يوقسه، رحمت آیتلری « بزرگه ! »، عذاب
 آیتلری « تگیلرگه ! » اعتقادی اوز می آدامق دن باشقه
 هیچ بر نرسه به خدمت اینمز.

«واذا تساوى فی الفبیح فعالفا

فمن التقى واینه الکفار ؟»

کتاب سماویلرک برینه انتسابی دعوی ایدن ملتارک
 اکثری خراب اولمش ایسه، یالکز شویل بر اعتقاد
 تأثیریله اولمشدر: نصوص سماویه بشارتلرینی یالکز
 اوزلرینه، قیامت عذابلرینی یالکز دیگرلره توزیع قیلوب،
 کتب سماویهده او قدر مدح قیلنور ایمانی لسانلرده یوروبده
 حیاتده اهمینی یوق بر ایکی یا اوچ دورت جملدن عبارت
 گمان اینمشلدر. او ایکی اوچ کلمه درست صورتده اعتقاد
 اولنور ایسه، انسانلری سعادت بوللرینه آلوب کتمکلری
 لازم ایکن، بالعکس، انسانلرک طورغونلق باناقلارنه
 استراحتلرینه سبب اوله کلمشلدر. شو حالک سببی نه در ؟
 قرآن کریمده فرقان سورهنک اخیرنده گی آیتلری
 اوقور ایسهک، کوررز، قرآن کریم دیمش :

«رحمانک بندهلری - یر یوزنده سکینه ایله یورر
 بندهلدر. جاهلر، آنلاره خطاب ایدرلر ایسه، پاک طوغری
 سوزی سویلرلر. ربلرینه سجده قیام ایدوب کیچه رلر.
 اتفاق ایدر ایکن اسراف هم صارانلق ایتهلرلر، بلکه هر

حالده اورتاچه اولورلار. شرك ايتمز لر معصوم قانی توکمز
لر، زندان پاك قالورلار، يالان شيلره شهادت و یرمز لر،
بيهوده اوراق شيلره تنزل ايتمز لر، ربلرينك آيتلريله
تذکیر اولورلار ايکن، قولاق سز کوز سز کبی التفان سز
قالمازلار؛ - يارب! بزه شادلق و یره چك خاتونلر بالالار
ويو! بزی متقيلره امام ايت! ديرلر. »

فرقان سورمسندگی او آيتلری هر برمر اوقورز.
لکن اکثرمك فهمنه کوره، الله اك اويله بندهلری «مسجد
قارتلرينه امامت ايدر، ياشيل جبه لر بورکه نور» قارت
حضرتلر، ياخود عمرنده دورت بش خاتونی آلمشده صالمش
غایت مهابت قارت ايشانلردر.

بيلورم: شو سوز غایت آغیر سوزدر. لکن نه
فيلایق، يالکيز بزی گنه دگل، بلکه همه ملتیزی، او
قدر گنه ده دگل بلکه تمام اسلامیتیزی خراب ایتمش بر
بلادر شو بلا!

انصافی ایدلم! کوکلمزده بر قدر گنه ایمان قالمش
ایسه، اوزمزی ده ملتیزی ده آدامق دن بر قدر حیا ایدلم
ایندی!

حاضر گه بس.

راز حافظ تا کفون نا گفته ماند.

مقصد: عذاب یا رحمت آیتلری اعیان اعتباریله

دگلدر. رحمت آیتلرنده «یعنی تاتارلار!» - عذاب آیتلرنده
 «یعنی انگلیزلر» مالفده تفسیر ایتمک خطادر. ایمان بزم
 کتب کلامیه ده بیان فیلنمش مسئله لری اعتقاد ایتمک، -
 صالحات فضائل الشهورلرده یازلمش ایزگو اشلری اشلهمک
 معناسنده دگلدر.

شو تنبیه بوندن صوگ نشر اولنه چق سوزلر مه بر مقدمه
 کبی اولسون.

خاتمه

۸

محترم «شورا» مجله علمییه سی واسطه سیل عموم عالم
 اسلامیه عرض اولنمش خالص، همده، اثبات قیلنه بیلور
 ایسه، فائده سی اهمیتی وار بر مسئله علمییه اوزرنده بر
 بولوک امام افندیلرک همده بر قدر خلقنک فتنه لنولری بنی
 بر آز اندیشه یه صالمش ایدی. زیرا «فتنه» یی اورنایه
 آنان بنم. او فتنه سببیل خلقنک عقیده اسلامیه لرینه خلل
 کله چک ایسه، البته بلاشبیه مسئولیت بالکنز بکاعائد اولاققدر.
 بوگنا کوره بن هوشمی باشمه طویلادم. مسئله یی
 مقدماتیله، ممکن اولا بیلر نتیجه لرینک هر بریله، شو
 مسئله خلافه فائمه اولا بیلر دلیللرک ائقویلریله، اوزون

هم اوزاق ملاحظه ايتدم. اصلی يوق، ثبوتی ممکن دگل،
 ضرری وار بر مسئلهی قوزغاتاق، طبیعی، بکا بر فائده،
 بنم ایچون بر مصلحت دگلدر. البته بن بونی بیلورم.
 اوز مصلحتی آکلماز در چه ده «قلندر» ده دگلم. دیگر لرلک
 فائده لری ایچون اجتهاد ایتک همئی عالم انسانیت ده عمومی
 اولوب کتمش بر فضیلت دگل ایسه ده، لکن اوز مصلحتی
 ایچون حرکت ایتک مجبوریتی «رحمت الیه» اقتضاسیله
 عالم حیات ده عمومی هم طبیعی قیلنمش بر ملکه لازمه در.
 ظن ایدرم، بن ده طبیعتک شو قانوندن مستثنا دگلم.
 مسئله خلافت ده «غلیانه» کلمش خلقک غلیانی ده، گمان ایدرم،
 بالکتر شو قانونک تأثیر یله وجوده کلمشدر.

بنم طرفدن قوزغاتلمش مسئلهیه بن تکرار نظر ایتدم.
 کوردیم: مسئله الله رب العالمین حضرتلرینه الک بیوک صفتیله
 تقدیس تسبیح سویله مکدن، اسلامیتک حسابی یوق مزایاسی
 قطارینه الک بیوک بر فضیلت اعتقادیه زیاده ایتکدن،
 عالم انسانیتی من القدیم خراب قیلا کلوب نوع بشرک باشنه
 کلمش بلیه لرک هر برینه سبب اولاکلمش بر اعتقاد ی
 تعدیل یا رفع ایتکدن عبارتدر.

مسئله فی الواقع بویله اولور ایسه، بن اویله مسئلهیه
 جانمی همه وارمی فدا ایدرم. یوق فی الواقع اویله ارلما یوب،
 بن خطا ایتمش ایسه، حسن ظن اساسنه بنا قیلنمش اویله
 بر اعتقاد ایچون، رب کریم قیامت کوننده بنی هم ده بنم

سوزمە اتباع ايدنلرى البته موآخذە ايتىمىز . اميدىم شويىلەدر .
 بن غفور كريم الله ارحم الراحمين حضرتلرىنى انتقام
 داعيەسنە ، غضب مؤبد سائقەسنە اسيردر ديهەم . ھەمە عالمەرە
 ھومى رحمت اولوق صفتيىلە نزولى قرآن كريم دە مصرح
 اولاش اسلاميتك اعتقادى اساسنە ھەمە انسانلرى مؤبد
 صورتە عذاب ايتىمك كىي الك بيوك بر قساوتى وضع ايتىم .
 بنم كندومە نصيب اولاجق ايكن نەمل ايدە ميه جگم بر عذابى
 حسن رضاملە ديگر انسانلر حقنەدە حكىم قىلامام . اسلاميتك
 حقيتى ايچون دە عذابك مؤبدلىكى البته لازىمدر سوزيىنە
 اصابت رنگى وىرەم . . .

«رحمت الھىە ھوميتنە» بنم نظرم شويىلە ملاحظەلردن
 نشأت ايدوب ، اثباتيچون دە ألم دە قرآن كريمك آيتلرندىن ،
 سيدالوجود نبى رحمت شارع اكبر عليه الصلاة والسلام
 حضرتلريتك صحيح سوزلرندىن متعدد برھانلارم وار ايسە ،
 او مسئلەنى دعوى ايتىمە بنم بيوك حقى البته ھر بر منصف
 تسليم ايدىر .

شو دعوامى اظهاردن بنى منع ايدىر ايسە ، يالكىز
 بر شى ايدە بيلور : علمى مسئلەلردە «تاقىيقە» ايلە حرىكت
 ايدىن ادبيلار ، ياخود «سياست قوللانورم» شعاريلە تستىر
 ايدىن پروفانلر بىكادىرلر :

«جانم ! حقيقت سىنك طرفەدە اولاي بيلور ، دعوالك دە
 سن حقلى دە اول ، لىكن ھر سوزك اوزيىنە كورە زمانى

مکانی وارد ر. روسیا مسلمانلری آراسنده اويله سوزلر
سويلنه مز. خلق نعمل ايده ميور. عوامك عقلنه درجه سته
كوره سوز سويله مك لازم دگلميدر؟ بزده سنك كهي اويله
مسئله لری نشر ايدر ايدك. لکن.....»

دعوامی نشر دن قبل شو نصيحتنه من حيث المعنى قریب
بر ملاحظه بنم فکرمه خطور ایتمش ایدی. لکن او ملاحظه
دعوامی اظهار دن بنی منع ايده مدی. بن نشر قيلنه جق
دعوامی اطرافيله محاکمه ایتدم. صوگرو «شورا» مجله
علمیه سی واسطه سیله عموم، عرض ایتدم.

لسان الغیب خواجه حافظ شیرازی حضرتلر ينك بلاغتيله
سويلنه مش:

«دلیر در خود آن کس بود که در همه حال»

«نخست بنگرد؛ آنگه طریق آن گیرد»

بيت حکمتيله حرکت ایتمش ایدم. عافيت، رضا افندی
حضرتلر ينك قلم ارشاداريله تالیف قيلنه مش «امام غزالی»
رساله سنده شجاعت ادبیه یه عائد او فوق العاده قيمتلی
سوزلری، مفتونیت الجاسيله، بيك دفعه مطالعه ایدوب حفظ
ایتدم ده کوکلم ده الك لذتلی بر ممنونیت، وفورانه بر جسارت
حاصل اولدی سويلنه بیلور سوزلر ايله سويلنه مز سوزلر
آراسنده فرق ايده بيلمك قدرگنه جزئی بر عقل، آقاری
قارالردن آبرور قدرگنه کوز اللهك انعاميله بن ده ده
وار ایدی.

بعض مسئله‌لری عوام‌دن کتم ایتمک فلسفه‌سنه نظر
ایتدم . کوردم :

بزم شریعت اسلامیه‌ده اسرار دینییه یوفدر . بر حقیقت
دینییه‌بی، یا خود مسئله علمیه‌بی عوام‌دن کتم ایتمک امری‌ده
بزم شرع شریف‌ده کلمه‌مش‌در . حقیقتک مکتومیتند بر
فائده ، معلومیتند بر ضرر سیاست عالمنده اولاً بیلور
ایسه‌ده ، خالص هم‌ده ساده مسائل علمیه‌ده هیچ بر وقت
اولاماز . ادیان سابقه راهبری کاهنلری «اسرار» قولالانوب ،
اوز مصالحت‌رینه یارار «مکتومیت» دن استفاده ایدر
اولمشلار ایسه‌ده ، اسلامیت اوילה «اسرار» دن ، «مکتومیت»
فلسفه‌سیله استفاده ایتمک کبی سیاستلردن تمام تمامنه پا کدر .
اسلام حکیم‌لری‌نک الی بیوکلرندن بری دیمش :

لقد کتاب الذین طغوا ، فقالوا :
اتی من ربنا امر بمرز .
فلا اعرفک بین القوم توحی
بطعن فی محشاهم بغمز ،
ولا تهوز جلیسک من قریب
تنبيهه علی سقط بهمز .

کاهنلرک «اسرار» لرنده مکتومیت فلسفه‌لری اسکی
زمانلرده کاهنلرک اوز مصالحت‌رینه خدمت قیامش ایسه‌ده ،
لیکن علمی مسئله‌لرک مکتومیت‌لری هیچ بر ملتیه هیچ بر
وقت بر پارلک فائده ویرمه‌مش‌در . «بن تحمل ایدرم ،
لیکن زنه‌ار صافلان ، عوام بونی تحمل ایدمز ؛ صبر ایت ،

وقتى كلور ، سويلرسن!« فلسفهسى اوزلرينه غايت بيوك
 قيمت ويروب انسانلرى عوام اسميله تحقير ايدن مغرور
 «حكيم» لره گنه ياقيشه بيلور بر مغروريت فلسفه سيدر .
 اويله واهى فلسفه لردن «دم» اوروب ، فيلسوفلك صاتمق
 يا خود تدبيرله حركت ايتمك خيالىله ، اسلاميتك عقيدەلرى
 اويله تدبيرله حركت صورتندە گنه محفوظ قالا بيلور در جەده
 ضعيفدر دعواسنه بن هيچ بر وقت جسارت ايتمم . اسلاميتك
 سنك بنم تدبيرلرله حاجتى يوقدر . بر دگل مليون سنك بنم
 كيبلك هجوملريله اسلاميتك بر ركنى يا بر فرعى هيچ بر
 وقت قاقشاماز .

بر وقت بزم متفقهلر كتب فقهيه ده شريعت اسلاميه
 نامنه نسبتدن اوتانمايوب ، عوام دن مستوريتنى لازم مسئله لرى
 يازوب ده «هنده مسئله تعلم ولا يفتى بها» ديمشله ايسه ده ،
 اويله حركتلرى بزم كوزده ادبدن خارج بر حركت ايدى .
 زيرا بر مفسده يى ايجابى اعتباريله عوام دن مستوريتنى
 لازم اولور ايسه ، مفسده يى ايجاب ايدەك بر مسئله يى
 شريعت مقدسه نامنه نسبتدن اوتانمق دها زياده لازم
 اولاجقدر .

دين ده على العموم ، اسلاميت ده على الخصوص «سر»
 هم ده كتمى لازم عقيدە اولماق حقيقتك اك بيوك اك برنجى
 شرطيدر . علمى مسئله لرى يوق بار خياللر ايله انسانلردن
 كتم ايتمك ، بنم گمانم چه ، اك فائده سز بر تدبيردر . بزم

لسان الغیب خواجہ حافظ شیرازی حضرتلری دیمش :

بکیست تورکی و تازی در فهم دین ای حافظ

حدیث عظم بیان کن بهر زبان که تودانی

یعنی دین آ کلامق حقه تورکی، عربی همه انسانلر برابر در .
علمی مسئلهلری نصل لسانله سویلر ایسه کده سویله . هیچ
بر شیک معلومیتی هیچ بر . انسانه ضرر ویرمز .

بر وقت اسلام عالملری، نصرانیت پاپاسلرینه یا خود
اسکی دین راهبلرینه تقلید ایتوب، گویا بالسنر اوزلرینه گنه
معلومیتی جائز مسئلهلری عوام نامیلر تحقیر قیلور انسانلردن
کتم ایتیمیه سلوک ایدر اولدیلار .

او محترم ذاتلر اوزلرینک حرکتلرینه بر اصابت
رنگی ویرمک ایچون صوفیه بیوکلرندن نقل اولنمش :

« هر که را اسرار دین آموختند »

« هر کردند و دهانش دوختند »

بیت عالبلرینه گویا موافق حرکت ایدر کورندیلر .

شو بیوک معناسی وار بیت بزم ضررمزه دلالت ایتمه یور .
زیرا صوفیلرک بیوکلرینه، بزه معلوم دگل «کشف» طریقله
ازه معلوم دگل علوم حاصل اولور ایمش . بز او «کشف» یدده
او علوملری ده انکار ایتمه یور ز . صوفیلرده بزه او علوملرندن
خبر ویرمه یورلر . ویره جک اولور ایسه لرده اینانهق مجبوریتی
بزده یوقدر . اویله شیلری بیان ایچون صوفیلرده لسان
یوق . قبولنه بزده مجبوریت یوق . بوکا کوره ده اویل

كشفيات حقننه صوفيلارڭ لسانلرى باغلانمشدر.

لكن عقلڭ نظرييله، ديوان طبيعتڭ يا خود قرآن كريبڭ افاده سيله معلوم اولاييلور شيلرى «سر» كى صافلامق، ظهورنده بر فساد امكانى خيالييله اويله شيلرى كنم صدندنه اولمق هيچ بر وقت معقول تدبير اولاماز. اگرده عوام ناميله تحقير قيلنور انسانلردن اويله شيلرى صافلامق، اسلاميتى حمايه ايتمك گمانيله اولور ايسه، اويله گمانلر اسلاميت شرفنه غايت بيوك جنايت اولوب، روس منلنده مشهور «آيو خدمتى» كى بر خدمت اولور.

شويله ملاحظه لرك بنم كوكلمه ده رسوخنه كوره، بن اولده بر قاچ اوفاق مسئله لرى، شمدى اوفاق دگل اهميتى وار بر بيوك مسئله يى مطبوعات عالمنه عرض ايتدم. بوندى صولڭده انشاء الله پر و اسز دها بيوك مسئله لرى برى آرقاسندن ديگرينى عرض ايدر طور ورم. آهسته آهسته مسائل فقيه اصول فقيه اسلامييه ده نوبت كلور. بنم طرفدىن عرض اولنمش مسئله لرى علمى صورتده جرح ييا تايد ايدمك انسان بولنور ايسه شكر ايدرم. لكن يالڭز «صوص! فتنه لر قوبارما! قبوللرينه عقللرينه كوره انسانلره سوز سويله!» ديهك آدملرك سوزلرينه شو دفعه اهميت ويرمديگم كى بوندى صولڭده اهميت ويرم.

بن ألمده برهانلرى طولانماش بيوك يا اوفاق مسئله لرك هيچ برينى ميدانه چيقارمام. اول دليللرمى برهانلرمى

حاضر ایدرم . تماماً اطمینانم سوکونده مسئلهیی میدانده
آنارم . اوپله ایسه، هر بر هاجهك هچومنه اعتبار ایتمکدن
کندومی یوفاری طوتار ایسه، البته بن معذورم .

شبل «الاسد» بصید دلم حمله کرد . ومن ،

گر لاغرم وگرنه ، شکار غضنفرم .

مهم بر مسئله علمیهیی خالص قرآن کریمك بلاغت
اعجازیه سیله اثبات ایدیه بيلمك قدر حاضرلگی بن اُلدیه
ایدنمش ایسه، البته ، قرآن کریمك عظمتنه مناسب بر
شجاعت ادبیه بنم کوکامده طبیعی صورتده حاصل اولور .
او وقت یالکیز «فته باصدمق» ایچون اوزاقدن سویلنمش
سوزارک هیج برینه بن قولاق ویرمزه گناهلی اولمام .
لکن ملت بیوکلرینك بری «پارمق سیلکمك» طریقیه
اوزاقدن «یاواش!» دیرسه ، البته تأدب اقتضاسیه آفاق
اوزرینه بالقوب عذرمی عرض ایتیه محتاج اولورم .

بویله تأدیبلرک بری ۲۵نچی دیسکابرده نشر اولنمش

۵۳نچی عدد محترم «ترجمان» جریده سنده بزه واصل اولدی .

۲۵سنه بزه همده ملت مزه رهبرلک ایدن ، ملتک بیوک

باباسی استاذ محترم اسماعیل بك غصپرینسکی جنابلری

بزده «رحمت الهیه عمومیتی» کبی بر مسئلهده رهبرلک

ایدوب «درسلرکده حکیم محترم احمد مدحت افندی

حضرتلرینك تاریخ ادیان درسلرینی رهبر طوت . نافع

و مؤثر بر خدمت ایتمش اولورسن . روسلر بر زمان

عاقلماردن امان بولامايوب «عقلدن بلا» مقالينى چىقارمىشلار
ايدى. عقل كوك بىلگىدىن شكايته بزم حقمن يوقدر. فقط
فيلسوفلار شو قدر چوغالىدى كه «فلسفه دن بلا» مقاله حقمن
واردر ايندى» ديمىشلردر.

گوزل نصيحت! البته بيوك پدرك نصيحتى ده بيوك
اولور. لىكن نصيحت ايدر ايكن، محترم «ترجمان» ك
۲۵سنه مقدمكى حالنه بر نظر ايتمش اولسملار ايدى،
نصيحت دها گوزل چىقار ايدى. ۲۵سنه مقدم املاسى
انشاسى يوق ترجمان شو كون جريده لرمزك ك گوزليدر.
او وقت لساقى يوق اسماعيل بك غصير ينسكى دورت بش
سنه صوك «فرنگستان مكنوبلرى» كى ك لذلى ك ادبى
اثرلار يازميه باشلادى و شو كون ملتك ك بيوك رهبرى
اسماعيل بك اولدى.

شو كون ملتزمك ك بيوك باباسى اولمق شرفنه كامش
اسماعيل بك جنابلر ينك املاسى انشاسى يوق كونلرنده
بيوك لرمزك هچ برى، حقلى اولمش ايسه ده، «محرر بلاسى»
مقالينى چىقارمادىلار. اسماعيل بك جنابلرى ظريفلك
يوزندن شو كون «فلسفه بلاسى» مقالينى چىقارور ايسه،
اختيارلرى وار. لىكن «عقلدن بلا» مقالينى روسلردن
آلوب سويلر ايسه، دها زياده اصابت ايتمش او اورلار
ايدى. زيرا طوقز يوز دورندن بو طرف ده اولان عمومى
حركتلرده ملتزم عاقلماردن امان بولامايوب، همان هنوز

«عقل بلاسندن» شكایت ایدیور. بزم احوال عمومیه مزه کلی بر سکتہ کلمش ایسه، «فلسفه بلاسندن» دگل، «عقل بلاسندن» کلمشدر. شو حقیقتی محترم اسماعیل بک جنابلری غایت گوزل آڭلار. بزه حرکتلرک هر بریننی مشاهدہ ایتدک، جمعیتلرک هر برنده حاضر ایدک. لسانزدن بر سوز چیقمادی، قولاغزدن هیچ بر آدمک اهمیتلی سوزی فوتولمادی بوکا کورده هر بر سوزی ضبط ایتمش ایدک. احوالک تفصیلی بزهده تماماً معلومدر.

محترم اسماعیل بک جنابلری بزی متوفی پروفه سور سالایوف جنابلرینک اثریلہ دارالفنون درسلرینه ارشاد ایتمشلر. گوزل. لکن الک قوللی قلمیلہ بزم جقمزی هضم ایتمه مش اولسلار ایدی، بزم ایچون دها گوزل اولور ایدی ۲۵سنہ بزه رهبرلک ایدن بیوک ادیب نیچون شو کون بزم افکار مزه غایت طار حدود تعین ایدیور؟

بز بوندن صوڭ انشاء الله یازاچق تاریخ ادیان درسلرنده دارالفنون درسلرندن می اقتباس ایدرز، یا خود دیگر بر طریقلمی حرکت ایدرز، یاقین آراده آڭلاشیلور.

در بساط نکتہ دانان خود فروشی شرط نیست.

یا سخن دانسته گو ای مرد عاقل یا خموش.


بز محترم اسماعیل بک غصیرینسکی جنابلریننی حرکات استقبالیه مز ایچون نمونه اتخاذ ایدرز. ملتمزک بر بیوگی ۲۵سنہ دن زیاده مدتده ثباتی اجتہادیلہ بزه غایت بیوک

درسار ویردی. بویله شیلری آڭلارز بوندن صوڭ تنزلا
بزی ارشاد ایدرلر ایکن، حقومیزی ده هضم ایتمزلر ایسه،
یارار ایدی.....

بن، شو مقاله مده، بنم طرفدن قوزغاتامش مسئله یه
اهمیت رنگی «مهم» لک نامی ویردم تکرار اویله سوزلری
سویله میه احتمال جسارت ایتمز ایدم؛ لیکن محترم «وقت» لڭ
۵۵۸نچی عددنجه «مدنیلک که امتحان طوتو» مقاله سنده ادیب
محترم برهان افندی شرف حضرتلری طرفندن یازلامش فکرلر،
همده استاذ محترم رضا افندی حضرتلریڭ قلملریله تألیف
قیلنوب شو کونلرده نشر اولنمش «رحمت الیه» رساله سی
بکا هم جان همده قوت ویردیلر. تشکرلر قیلوب، دعوامی
اثبات دوامنه عزم ایتدم. موسی بیگییف.

یا من رسم بمطلب، یا جان زتن براید.

صوڭ



~~AUG 20 1985~~

~~1985~~

